

適園叢書

張宗祥



滋溪文稟卷六

序二

正學編序

儒者之學祖述聖賢之所傳攷求經傳之所載端本以正人心立教以化天下有若魯齋先生許文正公其至於是歟至正四年春天爵忝官西臺三月帥御史敦勸郡學四月謁魯齋祠命山長祁文思輯錄先生褒封之制奏對之書及其哀誄之文號正學編刊布以式士類夫天將定一函夏躋世隆康則生文武神聖之君爲斯民主又必有道德中正之臣以輔相之然後明道術以敘彝倫興禮樂以敷治化伏觀世祖皇帝之所以爲君魯齋之所以爲臣其有見於斯歟故

朝廷公卿之上郡縣庠序之中皆明夫易詩書春秋論語孟子之文以敦夫君臣父子夫婦兄弟朋友之典曲學邪說悉罷黜之今稽是編文正之爲學也精思苦索以求其所未至躬履實踐以行其所已知知識儒先傳授之正辨異端似是之非其被召而立於朝也嚴乎出處之義盡其事上之禮謂國家居中土當行漢法則歷年多而可久治天下定其規模則事有序而不紊本之於農桑學校以厚民生輔之以典禮刑政以成治效蓋欲君之德比於三代之隆民之俗登於三代之盛者也嗚呼先王德業若此非學術源流之正乎是學也伊洛洙泗之學也自聖賢既沒正學不傳秦漢以降學亦多歧矣或以記誦詞章爲問學之極致或以清虛寂滅爲性理

之精微或以權謀功利爲政事之機要是皆非學之正此道之所以弗明世之所以弗治也不有儒先君子探其源而啟其途端其識以正其趨則士將俛俛然無所依歸覽是編者蓋知夫學術源流之正矣臨邛魏文靖公生於宋之季每以世道下降士習愈卑深慨歎焉其日記問學之末也今非聖賢之書而虞初裨官矣虛無道之害也今非佛老之初而梵唄土木矣權利誼之蠹也今非管晏之遺而錐刀毫末矣魏公斯言豈特一時之所當憂者乎嗚呼先王經世之志儒者有用之學久不著於世矣

世祖臨御方大有爲魯齋以眞儒之學啟沃彌正俾聖賢之道昭明於時詩書之澤衣被於世斯則有功於今日之大者

也是以封爵之崇從祀之典百世之公論終不可誣當是時有祖蘇張縱橫之術鉤距揣摩欲以利害動朝廷智術操天下賴天子明聖灼知姦邪隨殄滅之或者猶欲踵其餘習盜名欺世是亦勿思之甚也

列聖繼作文治休明儒者之學益見於用而魯齋扶世立教之功不可及矣維昔書院之建蓋以先生首應聘召見世祖於六盤被命教授京兆子弟考論是邦師友淵源實有所自諸生游息於斯讀聖賢之遺經考儒先之言行庶能正其趨向感而興起矣夫是歲秋八月後學蘇天爵序

濟陽文會序

濟陽之士讀書永安僧舍緝爲貢舉之文月再會焉或文義

字書之訛亦各有罰必欲詞章程式期於中選其志亦可尙
哉我國家奄有中夏治安日久始議設科取士其爲制也詢
之孝弟信義蓋欲其行之有常試之經義疑問蓋欲其學之
有本繼以古賦詔誥章表欲其敷揚宏休以備代言之選策
以經史時務欲其經濟斯世發爲有用之學是則朝廷設科
取士之意諸君子其亦思之否乎且濟陽介於齊魯之間聖
賢德化之所被也邑之先進有若故翰林學士楊文安公雅
德懿行爲世師表故河西僉憲程君今江西省掌故王君皆
由進士入官焯有聲譽者也諸君子接於師友之見聞考諸
文獻之原委振勵憤激講明正學他日薦名春官仰副國家
求賢圖治之美豈徒曰文辭之工而已乎集賢侍講學士通

奉大夫兼國子祭酒趙郡蘇天爵題

宋正獻文集後序

國子祭酒宋公既卒制贈翰林直學士范陽郡侯諡正獻其弟翰林修撰襲次輯遺文爲四十卷將版行之家貧不克御史其以爲請遂命江陵憲刊諸學宮公生京師早從親官江南留落江漢間最久學日益富文日益奇延祐初北還聲聞隱隱動臺閣一時名卿若清河元公濟南張公東平蔡公延譽不容口乃擢高科歷顯仕方期大用而公卒矣嗚呼天之生材固爲世用也或弗究厥施而遽奪之豈公之不幸耶世之不幸乎自昔燕趙山川風氣雄渾奇偉豪傑之士往往出於其閒故材氣強毅不隨世俯仰公之文辭高古務出於已

每歎近世文氣骯骯爲不足尙也國家設都於燕七十餘年人物生於興王之會奮立事功列官將相者盛矣而問學文詞之懿若公者幾何人哉公之行已大節具翰林謝公之銘章然尙有可稱者而眾或勿察也當天歷初公移疾家居殆及百日凜凜乎死生禍福不能怵也及至順中儒者以才華相誇尙詠歌治平以需進用公獨退然卽不能言此其胸中所蘊豈區區文士所能及哉天爵昔官六察嘗以士氣不振薦公可教胄子庶幾作新士類朝廷輒從其言未幾公卒江陵公所舊游流風餘思猶有存者文字之傳將及四海矣讀者尙能興起矣夫

宋翰林文集序

延祐中朝廷大興文治予友宋顯夫從其兄誠夫自江南來
出其囊中詩文若干篇一時學者共傳觀之公卿大夫爭識
其面而大宋小宋之名隱然傳播於京都矣未幾誠夫果魁
多士久之顯夫亦賜同進士出身初顯夫兄弟從親宦游於
江漢之間日益貧窶衣食時或不充故其爲學精深堅苦下
至稗官傳記亦無不覽詩尤清新飄逸閒出奇古若盧仝李
賀之流蓋喜其詞以摹擬之及聞貢舉詔下始習經義策問
旣擢科第遂入館閣爲校書編修修撰待制又嘗爲太禧掌
故中臺御史山南僉憲最後由國子司業入翰林爲直學士
至正丙戌之春年五十三以卒諡曰文清誠夫累官至禮部
尙書國子祭酒諡曰正獻始者誠夫之卒顯夫屬予序其文

後今顯夫之亡其子國子生顓復彙其橐篋序於予夫宋氏文學之偉固不待予言而傳也第念伯仲方以才能進用於時用不極其至相繼淪逝此中外有識之士重悼惜也昔者仁皇開設科舉本以敷求賢士作興治化今觀累舉得人之盛或才識所長裨益國政或文章之工黼黻皇猷議者不當盡以迂滯異懦詆訾之也嗚呼去古雖遠士之卓然能有所見毅然能有所守又豈無其人哉彼或誑之以利害視之以禍福事弗合義言不中度詭隨而妄作者亦有之矣顯夫學識持守迥與流俗不同斯其兄弟平昔講於家庭而世人或不能盡識也予以交游之久故深知之知之深則其哀之也切是則國家承平百年德澤涵濡而庠序樂育多士之功豈

第求其文章言語之工而已顯夫家本京師故題其集曰燕石云至正六年冬十月朔集賢侍講學士通奉大夫兼國子祭酒趙郡蘇天爵序

送韓伯敬赴杜浦巡檢序

儒者之爲學官由縣而州而路積百五十月始入流選其遷調之淹需次之久近者二十餘年遠者或三十年而其人亦老矣朝廷知其然略更其制願爲巡徼官者聽南士調廣海中州士調江南夫天生民而爲之士寧無豪傑有爲之才侖儻不羈之器顧使跋涉江湖風濤之險觸冒蛇虺瘴霧之毒其亦可憐也哉士之往者又豈得已也哉然而幸有一焉比歲山東河南之境旱乾水溢民罹飢寒盜賊竊發職警捕者

皆以爲病大江之南火耕水耨民頗豐足野無所警豈惟士
之幸也雖然國家建官本以爲民民旣豐裕當思撫字之方
休養生息之道方今郡縣貪吏黠卒害民爲甚江南大家被
害尤甚居官者不可不知也知之則思所以格之民其庶幾
少休乎唐山韓伯敬由正真定儒學正調江南杜浦巡檢將
行求言故書是以贈

靳先生詩彙序

昔者國家興隆之初合乎南北疆宇之大網羅人才布列官
守其政術之廉平文詞之雅正接武宋金遺老沛然有周用
於世是豈中則欲然不足外則軒軒以藝能自負者所可擬
乎甚矣祖宗德澤之深厚仁賢之眾多治化之隆爲不可及

已余鄉靳先生汝弼字舜卿生逢海宇之清晏親承耆舊之
典刑問學之富蔚乎有章政術之良秩焉可紀出佐江東憲
幕則稱贊畫之長擢尹浙西劇縣則著循良之譽惜乎蘊負
所有不獲盡施而亡家藏所著詩詩一編余因其孫穆得而
誦之緬懷國初治化人才之盛感而爲之書

曹先生文彙序

廬陵曹先生有文數百篇季子友仁板行於世徵愚序其端
昔者國家隆興之初人材眾多然或抱異材與學卒於小官
豈非命歟先生少年倜儻有奇節論議古今出人意表江左
初下一時名公爭與爲友而名聲日延作爲文章博洽古雅
不徇流俗可謂豪傑之士矣蓋先生平生雅好著述每言宋

有國三百年禮樂文物名臣碩儒皆表表可紀國亡史多散
失乃慨然自任著書若干卷未及脫藁而卒年方逾於知命
官僅止於徽巡此搢紳君子所以傷悼不能已也當中統初
朝廷肇置史館承旨王文康公鶚請修國史及遼金史其言
曰既亡人之國不可亡其史未幾宋氏亦滅是時諸老皆在
而三史卒不克修是亦天也至正癸未大臣始奏論輯其事
於是使者分行四方網羅舊聞先生去世已久仲子汝舟以
遺書來上眾皆愛其書法簡嚴而歎先生不及與於論撰之
列也嗚呼甚矣作史之難先儒以爲古之良史其明是以周
萬事之理其道足以適天下之用其知足以通難知之意其
文足以發難顯之情然後其任可得而稱也夫太史公以奇

偉之材去古未遠論者猶謂疏略抵牾况其下者乎况後世
乎愚嘗備員史屬閱近代載籍宋自建隆迄於嘉定實錄編
年紀志表傳蓋數萬言其未成書者第寶慶咸淳之事而已
秉筆者豈無所藉乎夫唐及五代初皆有書而歐陽公宋
公尋復爲之蓋山林有志之士若曹先生者又豈無其人哉
愚因覽其遺文感而爲之書先生諱毅字士弘家本廬陵今
葬寧國之南陵至正己丑春正月丙午通奉大夫江浙等處
行中書省參知政事趙郡蘇天爵序

至元新格序

國家以神武定天下寬仁御兆民省臺既立典章憲度簡易
明白近世煩文苛法爲民病者悉置而不用嗚呼斯其所以

祈天永命莫丕丕之基者歟故平章政事竇平何公榮祖明
舊章程號識治體當至元二十八年始爲新格一編請於
世廟頒行多方惟其練達老成故立言至切惟其思慮周密
故制事合宜雖宏綱大法不數千言擴而充之舉今日爲治
之事不越乎是矣蓋昔者先王慎於任人嚴於立法議事以
制不專用書是以訟簡政平海宇清謐其皆以是爲則歟是
書舊版漫滅省府各有一冊之覽者當體先朝寬仁之治慎勿
任法煩苛爲尙哉

兩漢詔令序

先王典謨訓誥誓命之文何其義理精微忠厚惻怛感人之
深能若是歟蓋情之發於中者實則言之著於外者切德澤

之及於人者深遠也三代而降文辭近古者莫兩漢若一時
典冊詔令混於紀傳有詔取司馬班氏書離其說決其先後
俾觀者見其愛民憂世恤刑薄賦遣使求賢之言圖治詞氣
溫雅制作森嚴甚有古之風烈夫明君賢臣訐謏于嚴廊之
上既務合乎典禮發號施令敷布於海宇之內必能格於人
心斯其上下之交孚治忽之所關豈偶然哉有虞之朝龍作
納言夙夜出納帝命惟允鄭伯爵也爲命裨諶草勅之世叔
討論之行人子羽修飾之東里子產潤色之況後世有天下
者渙汗大號鼓舞兆民皆出治之本經國之要豈可以私智
獨見而爲之乎我國家累聖相承興崇治化凡議大政皆命
文學老臣共之故詔令之頒渾厚質實及貢舉試士詔誥亦

用古體其軫念黎元追古制作誠非近世所能及焉然則帝王之制固本於五十八篇之書而兩漢詔令亦不可忽也是編吾家所藏西漢十二卷吳郡林慮錄東漢十一卷四明樓昉錄及官浙省與憲使王公議刊行之向聞於潛洪咨夔亦嘗纂次成書事著其略帝繫之說惜乎不傳獨得其總論刻置卷首又命進士高明輯其目文學掾江若泉正其訛或謂兩漢季年權姦柄用擅政稱制文宜刊削夫命令雖出於當時而善惡悉著於史冊錄之以示訓不亦可乎至正己丑五月甲午趙郡蘇天爵書

性理四書序

至正丁亥詔嚴守令之選以六事責之明年夏五月浙西廉

訪副使徐侯思讓拜括蒼郡守下車之初奉行六事惟謹獄
訟日簡治化日興暇則帥僚吏詣頰宮聽諸生講誦經訓於
是郡人興起於學侯益延師儲書盡教養之實又以周子太
極圖說通書張子正蒙西銘刊置郡學俾諸生閱習書成號
性理四書命文學掾雲某來求序嘗謂士之著述固有待序
而傳者若夫先儒立言垂訓推廣聖賢所未盡發開示後人
所未知聞又何待序而後傳耶蓋自周衰聖學失傳漢唐數百
年間豈無豪傑之士以孔孟之言爲學者歟然而窮極性命
之根柢發明義理之精微或有所未至也宋興既久周子出
於春陵河南程子關中張子相繼而起其微言大義傳諸學
者凡天地之所以生成日月之所以運行山川之所以流峙

萬物之所以茂遂鬼神之所以祕人道之所以明莫不原理以達於用紫陽朱子東萊呂公歎其廣大宏博若無津涯念窮鄉晚進有志於學無賢師友以迪之則不知所入也因其掇其關於大體切於日用者爲近思錄傳焉今國家九有會同崇尚文治而伊洛諸儒之全書廣布於世不亦宜乎嗚呼昔人有以道學政術爲二事者先儒深以爲非謂孔孟可作將推其所以施諸天下歟將以其所不爲而強天下歟蓋王者爲民父母視四海之民如己之子則謀治之術必不爲五霸之假名秦漢之少恩矣然則徐侯之刊是書其有意於古之治乎

嘗君孝義詩序

德州齊河縣有孝義之士訾君仲元其上世以貲雄金之季
年散財招壯勇保衛鄉社由是貲衰然里人咸賴之以安

聖朝平定之初君之父思振先業而家日裕有子四人仲元
居其次幼服田力穡悃悃無華動循矩度敦行孝義父病瘍
甚君拜醫求藥藥必親嘗衣不去體食不甘味父卒躃踊哀
號絕而復蘇棺殮葬祭稱從禮制既而母亦感疾伏枕二年
君奉侍彌篤及卒哀踰前喪母鍾愛君孝謹知其無所私藏
疾革屏人以金珠首飾付之君拜辭乞與諸弟毋益賢之異
時諸弟求分財別居君不能止聽擇田廬便利者取之而已
略不介意也諸弟不幸早亡君撫遺孤如己子待中外姻族
盡恩義里閭貧無依者十餘家割良田百畝俾種植自給以

終其身歲大疫貧者不能具藥餌有食瓜輒自汗者君買瓜
載米過病者家親分與之或言疫氣相染不可君曰吾以誠
意援人於危造物者忍害之乎其死者又量賻之閒歲不登
鄉人有所假貸積不能償悉取券焚之於是一鄉之人皆感
其惠而君之孝義彰於遠近矣縣以其名登之府部使者覈
實以聞朝議命旌其門閭仍令史官書之君之子德明官從
仕郎管句南臺架閣嘗與浙西憲幕王君威可同掾中臺相
好也故威可將求諸公詞詠君行屬予序其事嗚呼昔者先
王之爲治也井天下之田而俾之耕民無飢寒之憂矣建大
小之學而明其教民興孝弟之行矣故居於其家出入有相
扶之義患難有相恤之道老幼皆得其養生死俱無所憾或

一夫不得其所在上者則曰時予之辜斯其所以盡爲民父母之道者歟我國家覆燾九有惠鮮小民德至渥也然而一鄉一里或罹水旱之災民尚有仰其好義之家以周給之者蓋人之生稟乎天地之性惻隱仁愛之端莫不因其有所感發而著見焉是以篤實之士不爲物欲所誘而力行之非有待於外也觀乎嘗君慈祥愷弟之行著於家庭忠厚孝友之風推於鄉黨凶歲則出其有餘以濟不足飢者與之以食疾者揀之以藥殮者送之以藏是則朝廷治化之隆風紀敦勵之嚴有以致之也宜乎大夫士誦詠其美以爲勸者哉

送劉德剛赴三尖塞巡檢序

國家設巡徼之官所以詰姦禁暴俾一鄉一里之人莫不獲

其安靜休養之惠焉然或地有險夷俗有美惡故政之及人
又有淺深遲速之異是則係乎人之才能何如耳浙江之東
有州曰瑞安州之西南地左而民眾故設巡檢以分治之至
正七年春劉君德剛承命而往徵言以自勵德剛爲真定判
府君之曾孫葭州府君之孫歷游京師兩國子監而得是官
故其本諸故家之所見聞淑乎明師之所教養加以氣粹而
才良言慎而行雅其於職事必克有以舉之比歲吳越之境
年穀屢豐盜竊弗發居官者不能廉靜以息民貪墨興事深
文巧詆民始不勝其重困矣故獄訟之煩巡邏之擾則有造
幣之僞食鹽之私榜笞逮繫無所不至嗚呼安居而樂生人
之常情也或陷於罪戾者又可哀矜歟方今刑獄病民豈

獨江南也哉雖然瑞安爲州在昔多搢紳儒先其商訂古今
考求制度凡天官律歷井田封建禮樂政刑靡不講貫而儒
學之盛鄉俗之美民之易治可知矣夫朝廷命學校之官居
巡檢之職匪第資其捍禦之方蓋欲責其撫字教養之事也
德剛自其祖父愛民而好士又知讀書勤於職事故予深有
望焉

江西僉憲張侯分司雜詩序

讀國風之詩有以考俗尚之美惡知政治之得失然皆民俗
歌謠非公卿大夫雅頌之音也薊正張侯士從由江西僉憲
來官燕南出示按治之暇所作歌詩若干首備見江右吏治
民俗之弊安得不爲之三復慨歎乎夫一道德以同風俗隆

古之治所由興也江右之人何獨譁訐至於斯耶蓋大江之南山水清麗人生其閒多輕俊而喜文平昔負氣不肯相下官吏貪黠者又從而逗撓之彼始百計求直紛爭而不息矣是豈民之本性俗之素然哉張侯爲人廉明慎密按部吉贛袁瑞之境皆俗之尤健訟者侯發姦摘伏彰善樹弱風節矯矯遠邇震聳民稱道之不容口有同官同氏年差長者民恐或誤乃以別號爲侯稱呼其愛慕如此則好善而惡惡人之常情也侯在官二年凡決罰官吏若干人徵贖若干萬貫使爲部使者皆然天下何患不治乎方今朝廷念民疾苦特命宰臣精擇守令其不才者悉罷遣之求治之意蓋甚切也郡縣之中豈無廉平爲政惻怛愛民仰副朝廷之意者乎澄汰

而顯白之慰薦而賞罰之則部使者之責也然則如張侯者
豈易及哉讀其詩者又豈無所感發哉燕南密邇京師比歲
水旱年穀不登元元困乏張侯巡行郡邑將見大振風采黜
陟貪廉休養黎庶日臻於熙洽匪徒彤諸歌詠而已天爵早
歲與侯同游成均友誼深厚因覽其詩而告之以此至正戊
子五月通奉大夫浙東海右肅政廉訪使趙郡蘇天爵序

滋溪文集卷七

碑誌一

元故翰林侍讀學士贈陝西行省參知政事呂文穆公

神道碑銘 奉敕撰

至正六年秋七月癸卯御史臺臣傳敕若曰故翰林侍讀學士呂端善道明經濟

仁宗皇帝召入禁林由五品官超拜二品及薨褒封賜諡墓隧之碑猶未有刻其命集賢侍講學士蘇天爵製銘河南行省參知政事王守誠書翰林學士承旨張起巖篆額臣聞命惶懼謹按呂氏家世洛陽葬新鄭累世仕宋爲名輔相公七世祖公緒與申國正獻公爲從兄弟六世希衍失其官封希

衍生衡金初涉河家武涉衡生三子全全生五子唐慶
庭膺欽貞祐中舉族徒汴膺語伯仲曰今兵戈方興宜各逃
難庶幾宗祀幸有存者乃挈其子偉入宋偉改名文蔚以經
義登進士第庭避地河內大兵遽至謂其子佑曰汝已長立
當自求生佑艱關險阻由河南山東轉入雲代既久至京兆
事已稍定樂其風土家焉佑卽公之考府君也初

世祖皇帝受封食邑於秦請命故相廉恆陽王宣撫京兆聘
覃懷許文正公教授多士府君素有高識一見文正卽知其
爲異人遂命公從之遊居嘗訓公曰吾世衣冠大家汝當學
儒以崇先業勿舍正道而趨異途公資稟旣高博識力行

世祖旣踐天位特命文正公爲國子祭酒及拜中書左丞猶

選國政大臣子弟從之授業迨其謝政復以集賢大學士師長成均文正請以子弟在四方者爲伴讀分命驛召赴都相與輔佐爲教制可關中應召者三人公其一也當是時風氣渾厚人材質朴俗無驕矜華靡之習故言易入而教易從世祖皇帝以天縱之聖思有以作新賢才丕變風俗而貴游之子言語不通視聽專一文正公躬行以表帥之設法以教養之因其氣質之凜就乎規矩之正本諸國朝之憲章協於古先之典禮其後成德達才布列中外大而宰輔卿士小則郡牧邑令輔成國家之政治者大抵多成均之弟子也是則文正興學作人之功顧不大歟蓋惟

世祖之聖故能興隆基業惟文正之賢故善樂育人人才惟公

等之能故克輔成教養久之文正以疾辭歸公亦還京兆御史臺薦其才命爲陝西道按察司知事未行會宋降者言襄漢新附之民緩之則畔散不屬急之則虺餓勿安呂子開者向爲襄陽制閫參謀今退居鄂其人悉知宋事可徵用之朝廷從其說方議遣使而難其人或言子開卽公之從叔父文蔚公聞之喜蓋呂氏宗族自汴中解散四十餘年矣時江淮兵猶未戢公慨然請行至鄂卽諭天子德意子開入覲爲陳撫安襄陽便宜詔拜翰林直學士堅辭不受時人或高子開之節而多公之功至元十有四年江南旣下公擢從仕郎四川行樞密院都事時四川制置使張珪據重慶合州安撫使王立據釣魚山猶持宋節負固不降詔樞密府分兵取之故

相李忠宣公德輝行西樞府事於成都獲偵卒張邵等數人將殺之公曰彼所以不卽降者豈以昔嘗抗蹕先朝恐城降日悉見誅夷之故歟今宜釋邵俾歸諭立未幾立果遣邵等齎蠟丸書至成都忠宣請與東樞府同受降而後期不至忠宣承制署立仍安撫使知合州開倉振民禁輯剽掠而瀘淑崇慶思播夔萬等郡聞之相繼送款巴黔人感公之惠與忠宣並立生祠事之東樞府恥其無功誣忠宣越境生事械立於獄以聞公適以事至京師言於平章賀公仁傑賀公入奏詔卽釋立賜金虎符佩之公亦獲賜金織衣弓刀鞍轡等物進階奉訓大夫四川行省左右司郎中承命徵理蜀帑得金幣若干萬兩匹轉奉議大夫同知順慶路總管府事以疾辭

家居者十年徵爲國子司業以丁內艱未終辭三十年除華州知州公曰聽訟決獄治之末也當敦本以訓民其庶幾乎歲餘勸農興學皆有成效士知明於經術民知勤於稼穡藹然有古循吏風在官三年代者將至民老幼數百詣行省請留公再任其德化感人若此公退居於里日與韓公擇蕭公勳同公恕講論道義從容函丈而關陝學徒從者益盛由是士知自重而不苟進尙經學而後文藝皆文正啟之諸公有以成之也皇慶初元

仁宗大興文治拜公翰林侍讀學士中奉大夫知制誥同修國史時方議行貢舉公曰經明行修質而少華非惟士有實學國家當得真才以登治平明年引年謝事上從其請遣使

送歸又明年改元延祐十二月某甲子薨享年七十有八葬咸寧縣東陵鄉驪山原贈通奉大夫陝西行省參知政事上護軍追封東平郡公諡文穆曾祖妣朱氏祖妣張氏妣某氏元配晉氏繼姚氏俱追封東平郡夫人合葬公墓子男三人杲未及仕而卒果贈中議大夫禮部侍郎上騎都尉東平郡伯楨隆禮州知州羅羅宣慰司副使孫男三人曾魯著魯由陝西行省照磨雲南行省都事社稷署令擢拜監察御史階中議大夫曾孫男二公直公肅俱補國子員外郎伯充篤信好學既從許文正公游專事踐履居家律身養生送死造次弗違於禮益關中土厚俗敦太史楊文康公恭愷家世爲儒冠昏祭一遵禮書公之考府君亂定來歸念親喪未葬不御

酒肉者數年遇忌日輒悲泣巫覡怪神一無所信將終遺命
勿用二氏公之治喪稽司馬氏書儀朱子家禮及楊文康公
已行故實使古人送終之正復見於世故關中喪葬多合乎
禮者由公等一二儒家爲之倡也大德中河東關隴地震月
餘不止公與蕭公勳各設問答數千言以究其理公復移書
廟堂援董仲舒天心之愛人君出怪異以警懼之說及言方
內重囚不過數十百人國家慮有冤抑歲再遣官詳讞今秦
晉數十萬眾死於一時豈容愒然忘情乎天子宜責躬修省
宰臣當避位待罪旁求直言極陳過失期於災弭而已蓋公
雖居畎畝未嘗一日忘天下也臣聞古之君子莫不親師友
以修其學惇典禮以肅其家措諸於用則教化興而風俗美

然自秦漢以降士之於學則以文章記誦爲工施之於政則以功利權謀爲上至程朱大儒始本洙泗遺書發明聖賢修己治人之道許文正公得其書於南北未通之日心領神會躬行實踐及遇

世祖皇帝其學大行迄今海內家習其書義理賴以不泯臣承詔序述呂公行事因論及此謹拜手而爲之銘曰

於赫

世祖混一文軌匪儲材能疇克任使譬之作室大木是資楨榦居楔巨細不遺世廟御天巍巍其功將相文武會合雲風顧瞻儒臣命汝典教多士有作來則來效亦有勳舊名闕之子佩矩帶規儼若儒士公在左右以翼以承教養有方治

化克興江漢之行川蜀之役惟公一言事如破的及典外郡
化民有道歸休於家允爲元老思文

仁宗登用老成乞言議政曰有典型盛德垂裕蔚多孫子

天子有命擢拜御史曰汝祖考簡在

仁皇道明經濟聞於家邦驪山之原墓有貞石詔錫銘詩車
過者式

大元贈中順大夫兵部侍郎靳公神道碑銘 奉敕撰

故福州路總管府判官靳公既卒之十有八年爲至正乙酉

其子義列官朝著推恩贈中順大夫兵部侍郎上騎都尉追

封西湖郡伯是歲義進拜樞密院判官 天子遣使分道訊

民疾苦義持節宣撫陝西明年還朝又從幸在上都秋七月

甲辰樞密臣奏向者院判臣義褒封其親而墓碑無刻請命
集賢侍講學士臣天爵爲文侍御史臣思立書翰林學士承
旨臣起嚴篆制若曰可臣維國家建邦樹官所以爲民故守
令之選屢形於詔旨若惠政著於當時遺愛洽於一邑歷時
雖久民猶頌之惟公善政最於江左其墓道之石誠宜有銘
矧重以

聖天子之命乎謹按公諱孟亨字嘉夫由儒起家試吏歷官
劇縣有聲初至大庚戌公以從仕郎爲贛縣丞縣當廣海要
衝環城皆水歲造舟爲梁以通行者而有司徵斂之煩使者
追呼之急民甚苦之公籍居鄉下戶共二千三百家驗所輸
糧多寡造舟小大共三百艘各署主名於舟尾舊則新之弊

則完之聽其自爲吏弗得與凡差舟爲三等十舟爲一甲三甲之中率十閱月各用其一迎候江岸使者之往來有司之轉運刻期皆集役滿則聽其歸約十年復一役民大便之載其法於石其他賦役皆以糧爲差等上焉以供海運次應差役下則供襍泛之勞具籍申府而永行之吏胥皆不得因緣爲姦弊矣歲餘遭父喪去官當江南內附之初戶籍繁衍時科目又廢所除官多貪污雜進之流獄訟旣不克理而譁許之風日興不知者悉以病民何哉公以延祐丙辰遷承事郎雩都縣尹思欲作新其俗首捐己資大修學宮士民胥勸又建三皇祠宇命鄉社皆立義塾擇士之高年有聞者爲之師教以孝弟又輯農書導民稼穡自是邑人漸知禮讓而譁許

之習亦少變焉泰定甲子調星子縣尹縣廨歲久弊壞官吏
治事幾無所容公偕同列割俸繕治民不知勞公久居江右
熟其土風聽訟日益精明大府知其材他縣所訟亦以屬公
開先寺僧與南康郡縣爭田府檄治之公詣田所召佃人鄰
人各言曲直田有小溪介之訟之所由興也公命吏具文書
以田在溪北者歸之學溪南者歸之寺遂不復爭都昌民叔
姪爭田積年不決逮者數十人府檄復以屬公公取論語一
編語及彝倫即使叔姪誦讀公申以孝弟親睦之誼仍令逮
者與聞頃之逮者請曰曩時官吏意有所私此訟之不決也
今明府以善諭民敢不首實田本姪產叔父因其幼孤奪之
於是叔父感泣盡以田券與姪遂相慈孝如初時人謂公爲

治以理而不以刑真得古人慈祥化民之意哉公惠政甚多此其尤較著者云及進承直郎福州路判官莅事七月而卒享年五十有七天歷戊辰九月二十四日也是歲某月某日歸葬洛陽縣某鄉某原靳氏本絳之曲沃人金明昌閒始徙家洛公曾大父忠大父貴再世隱德弗耀父元累官奉訓大夫僉海北海南道肅政廉訪司事妣尙氏封洛陽縣君配李氏封西河郡君元統元年六月一日卒享年六十有一配君有淑行生子男三人其長曰仁江西行中書省檢校官階儒林郎仲卽義也由樞密院都事擢拜監察御史中書省右司員外郎禮部侍郎進佐樞府階中憲大夫其季曰智江南行御史臺掾轉樞密斷事官知事階將仕郎女二人長適都昌

縣丞大名曹本次適福建元帥府照磨廣平楊恭孫男一某
女三長適監修國史宣使真定王惠餘幼公有母弟三人仲
亨由僉憲公蔭入官累遷汝州提舉有子曰禮臨江路清江
鎮巡檢季亨未仕而卒有子曰溫歷河南汴梁郡掾曰良懷
慶織染局幕官女適同郡楊公直公世業儒家庭之閒雍容
孝讓父子昆季自相師友初僉憲公欲以遺澤恩畀其孫仁
懇辭請授其弟其後仁義亦以公之遺澤讓其弟搢紳稱之
僉憲公以孝行聞於郡國故相奧魯赤行省湖廣辟署掾曹
擢廣西帥府都事改知江州調安南行省員外郎復遷廣西
帥府經歷海北立廉訪司選爲僉事不立聲威所歷部震悚
蓋聞望素孚於人故也雅尚恬退未老謝歸築室午橋時與

緘山陳公天祥觴詠爲樂有詩百餘篇皆本諸道義有裨世
教之言公幼警敏稍長能通諸經大旨議論奇偉作詩有盛
唐風未冠洛人已有從授業者憲府論薦擢洛陽縣學諭改
陝州儒學正時僉憲官廣西公奉母省焉母道病卒扶柩還
葬免喪復往僉憲有他除帥府進公爲掾公交人以誠出言
而眾信服邕賊猖獗帥府出兵討之公往諭其酋曰汝據險
爲寇今兵且至念汝無知故欲活汝汝能悔過其家可保否
則無噍類遺矣賊感其言相率請降帥府以其功聞未幾聞
岑黃欲相仇殺連帥命公視之公復諭以禍福而兵亦止全
活者不知其幾公將赴雩都也適有詔經理其田令民自實
糧數輸官禁其欺隱縣之承樂鄉襍溪洞閒豪民三十餘家

相聚亡命約所徵糧勿與公至卽上言經理擾民日從家僮
單騎入其鄉召父老告之曰朝廷徵糧以佐經用果無欺隱
官不强汝且不輸糧之罪小若集眾爲寇是自取滅亡國家
刑憲不可輕犯當從吾言各安其業執其首惡罪之餘皆帖
然久之詔免所增糧勿取民情大悅又黃金藍田等鄉僻在
萬山賦役刑獄多不從命民有殺人者事覺公抵以罪自是
賦役所輸皆不敢後非公誠實感人其能有以信服之歟公
方施於有政而遽云沒蓋不在其身則垂裕於後宜其子孫
碩大貴顯欽承

天子之命賜銘表墓以侈寵光凡在郡縣守臣尙亦知所勵
哉故謹爲之銘曰

皇矣

列聖治化清靜孰承孰宣曰守曰令誕敷明詔責之薦揚匪徒才能實惟循良嶷嶷斬公早詔家學德也溫溫才也犖犖大江之西百萬其家官或匪良民訟亦譁公爲令丞宣布治化廉公而明文雅蘊藉賦役之重公則斯平獄訟之煩明則斯清於穆元聖聿嚴廟貌匪華土木式崇治教好生欲安民情之常彼雖遠人豈願跳踉教匪話言惟誠與信民庶可近弗煩合刃公方有爲天遽奪之遺愛在民民父母思公多賢嗣有位而耀出佐藩宣入職樞要惟今

天子惠鮮下民詔遣使者宣撫諮詢公之仲子簡在華選詔錫公銘百世丕顯

皇元故昭文館大學士兼國子祭酒贈河南行省右丞

相耶律文正公神道碑銘

有序

世祖皇帝既踐天位，博尚文化，爰命相臣許文正公衡典教成，均以育賢才，以興治平，規模宏遠矣。一時及門之士，嗣其師傳，久而彌尊，海內共推之者，惟公一人而已。公諱有尚，字伯強，姓耶律氏，遼東丹王突欲十世孫。金正議大夫尚書右丞文獻公履之曾孫，中京副留守贈龍虎衛上將軍工部尚書善才之孫。皇贈昭文館大學士資德大夫莊愼公鈞之子也。五季之初，遼人奮興東北，奄有燕雲，號令征伐，赫然與中國爭衡。東丹王以太祖元子讓位，不居，來歸於唐，賜姓名曰李贊華。子孫世事華學，衣冠日盛。文獻公深通天文，歷仕世

宗章宗功載史事記金將亡尙書死義於汴莊慎公留居河
湖東平嚴侯重其世望請徙家焉中統初制授東平工匠長
官佩金符以高年終公生有奇質身頎然以長毅然不苟戲
笑

憲宗皇帝臨御廉文正王希憲奉

世祖潛藩命宣撫關中奏徵許文正公爲京兆提學以淑多
士公逾弱冠艱關數千里贏糧往從之遊文正公見其學苦
而志篤深器異之

世祖立極召文正公入朝公還東平會姚文憲公樞來爲宣
撫使辟公從事幕府公以不能政事辭姚公曰今正欲汝習
政事也未幾姚公赴召公亦退休於里日益力學當是時齊

魯之士踵金辭賦餘習以飾章繪句相高公厭薄之專明經
訓人或以爲迂公弗渝也至元八年文正公由中書左丞屢
請謝政

世祖勉從所請擢拜集賢大學士兼國子祭酒專以成均之
教責成焉凡勳臣貴戚之子弟及海內名士咸從受業乃請
於朝驛召弟子在四方者十一人爲伴讀公居其一旣至日
與諸生共相講學蓋文正公之爲教也先之小學以端其本
次之羣經以達諸用勤之以灑掃應對以折其外嚴之以出
入游息以養其中故雖勳伐世胄變化氣質周旋動靜皆有
可觀而公匡救輔翼之功蓋不細矣十年文正公南歸諸生
祖餞於國都門外文正悉語之曰他日能令師道尊嚴惟耶

律某能之汝等當以事我之禮事之可也久之起公爲國子
助教而諸生多昔時同門者皆帖然敬服蓋公以文正之爲
教者教諸生諸生亦以事文正者事公入兩賢之十五年擢
監察御史以從父鑄居相位辭不拜明年遷祕書丞二十年
以承直郎知薊州事薊邇畿甸鷹師春秋縱獵橫有需求公
獨不與州無職田歲徵於民公獨不取民深德之金大定時
文獻公以疾出典是州建無恙亭歲久亭壞公修完之 裕
皇在東宮遴選僚屬召公爲詹事院長史初 裕皇設學於
春坊命贊善王公恂教養宮府侍衛之子孫王公卒徵處士
劉公因教之劉公歸至是命公教之尋授舉訓大夫國子司
業一蒙古生不請命遠出聞公欲深責之祈中貴求免公曰

教法不可廢也竟扑之 裕皇時時召見聽諸生講誦古訓
屢賜公帛慰勞良厚二十四年初置國子監學設祭酒司業
博士助教員始給印章分官署以典教詔春坊學徒從公赴
監命太常卿周公砥爲祭酒公仍司業明年公拜祭酒進階
奉議二十六年以莊愼公年老辭職歸養 成廟正位敦請
還監元貞二年加朝列大德元年遷集賢學士加中議仍兼
祭酒迎莊愼公就養京師五年加大中學士祭酒如故公在
官凡三進階朝廷一時尊敬師儒之禮益隆

成廟初年銳意求治嘗議遣使問民疾苦糾治官吏貪邪而
宰臣貪墨者或欲因而肆赦公倡言曰今方遣使復行赦宥
卽與 皇上作新政務除治姦弊之意不同赦不可肆眾是

公言而止時國家所頒詔令科條皆忠厚惻怛孳孳爲民故
海宇清謐年穀豐穰而諸老冠蓋雍容嘉時令節擇名園勝
地觴詠宴娛藹然太平人物之盛然每公在列諸圖則以禮
自持號公爲畏友焉七年遷太常卿進嘉議八年莊愼公捐
館公護柩還東平喪葬合禮閭里範之明年復授集賢學士
驛使召以憂辭又明年拜昭文館學士遷正議兼國子祭酒
中書遣使卽其家徵起時順德忠獻王爲相令使者道朝廷
佇望之意勿以老且病辭迺行 武宗卽位大臣奏請許文
正公典教胄子耶律某繼之自助教致位祭酒匡輔造就功
多久列三品宜優爵秩 上曰是儒學舊臣也進拜公昭文
館大學士仍兼祭酒至大元年進階中奉俄以疾辭踰年始

允詔賜楮錢五千緡使者護送歸鄉里延祐六年仁宗清燕
語及先朝故老遣近臣賜公酒醴搢紳榮之初公受學於許
文正公於文正言行默而識之其後考次年譜筆之於書凡
日用纖悉取以爲師法焉而文正德業學術之微因以表見
於世公嘗曰文正著述惟小學大義孟子標題讀易私言而
中庸四箴等說乃門人所記他則不足徵也莊愼公嘗同昆
季作傳家誓訓以教子孫大概以謂自東丹王以來生長中
國素習華風父子夫婦綱常嚴正累世勿變不當效近世習
俗瀆亂彝倫公佩服遺訓惟謹治家嚴肅以身先之諸子卓
然有立其教人也師道尊崇凜乎若不可犯出言簡而有法
廟堂論議成均講授人皆聳聽恐不卒得聞公教國子幾三

十年始終如一學規賴以不隳作成後進居多故參知政事
蔡公文淵始由諸生擢爲學官公加敬禮引爲同列士咸多
其識量公於祭酒以集賢學士昭文館學士兼者皆再特授
者一及公辭歸朝廷嚴於擇人曠官者數年古所謂才難者
不其然乎公旣歸老屏居別墅未嘗一入城府自號汶南野
老表所居曰寓齋終日端坐略無惰容晚不能視令弟子誦
讀經史心領神會怡然忘倦門生朝貴四方之士造謁無虛
日聽其言論或不忍去旣葬監察御史王笥請卽公鄉建書
院寺宇垂範後學廷議是之公妣謝氏金進士慶陽總管適
祖之女繼妣李氏俱封漆水郡夫人元配楊氏五十四處宣
差坤珍之女早卒追封漆水郡夫人繼配伯德氏濟兗單三

州都達魯花赤山哥之女有賢行封漆水郡夫人壽九十卒
子男五人長奉訓大夫鄧州知州兼管諸軍奧魯勸農事楷
次太常禮儀院奉禮郎朴次朝散大夫簽江南湖北道肅政
廉訪司事權皆伯德夫人所出也次陝西行中書省宣使括
次將仕佐郎廣源庫知事檢庶也女一人適奉訓大夫川州
知州李孝恭封宛平縣君孫男五人自新自得自明自成自
本女三人皆幼公享年八十有五以延祐七年冬十二月某
甲子告薨於家制贈資德大夫河南江北等處行中書省右
丞上護軍追封漆水郡公諡文正以至治元年春三月丙申
葬須城縣登賢鄉執政里之原銘曰

維遼有國於燕之北金氏承之皇武斯克於皇建極九有同

文革其故俗治化維新凡代大家肖孫賢子德澤涵濡克振
克起公生明時頎然長身嚴威儼然寡笑與言覃懷許公卓
爾先覺有德有言尊明聖學公從之游丕衍其傳持守範模
仰鑽高堅彬彬貴游昔也同志今焉師之有教無貳佩規帶
矩誦詩讀書禮法循循衣冠舒舒時方治平賢才輩出羽儀
周行楨榦王室推公之功克紹其師考行定諡士無異詞伊
昔燕雲將相棊布隆名極位朝起暮仆惟公之家世德孔揚
歷年四百率由舊章孰綱孰維家有誓訓後克將之永有令
問

故元國子司業硯公墓碑

并序

世祖皇帝旣一函夏大興文治迺命相臣典教胄子次則分

教天下之士至元二十四年始置國子監學設官以司教載
特召真定府學教授硯公爲國子司業超遷七階賜五品服
士論翕然推重於時朝廷憲度初立治平方臻其於才能往
往不拘常格而擢用之故百職得人政教修舉此則中統至
元一時號稱盛治者非偶然也國初歲在乙未王師徇地漢
上公與江漢先生趙公復俱以名士爲大將招致而北久之
周流河朔不獲寧居歲戊戌詔試儒士公試西京中選歲壬
子詔實戶口公家真定著儒籍自是專以授徒爲業公通諸
經善講說士執經從而問疑者日盛公告以聖賢之旨諄切
明白不繳繞於章句中中原碩儒若容城劉公因中山滕公安
上亦皆從公授經時來官燕南宣闡及部使者多名公卿聞

公之名咸造見焉已而嘉其行義又其薦之擢爲本郡教授凡十餘年循循爲教始終不倦作成後進居多聲聞中朝遂有徵召之命其在成均律身嚴以有禮得師之道屢以陽城忠孝之說訓迪諸生盡皆化服是時風俗敦厚人皆尙行而文詞浮華之習士鮮好焉故治化人材於是爲盛居歲餘公移疾辭歸朝士及諸生祖餞於國都門外觀者以爲榮公姓硯氏莫究其始所出每見儒者輒詢問之其師初命公名曰彌堅字之曰伯固其父止命名堅故公在官稱彌堅自稱曰堅蓋不忘父師之訓也晚年嘗自爲譜言其先世潁州人宋靖康丙午燕雲兵興高祖汝翼挈家南徙僑居於郢再徙德安之應城曾祖諱震祖諱珍生理麤完卽德安買田家焉父

諱端禮妣黃氏進士直卿之女直卿有孫曰中穎悟善學公
生七年學於黃氏家塾年十四始習詞賦補府學生十六從
鄉先生王景宋學景宋名登以進士起家仕至京西路提刑
京湖制置大使司參謀爲人卓犖奇偉公學得其梗概慨然
有志於事功年十八又從袁州劉仁卿學議論年二十四來
歸聖朝公問學漳正文章質實務明道術以敷世教其爲人
亦然自少至老清苦嚴重士咸服其學推其行曰老成君子
云有鄖城集十卷藏於家公之卒也家徒四壁立非士友賻
之幾不能喪臺閣名流周公砥闇公復李公謙焦公養直爲
誄以哀之公以至元二十六年九月癸卯卒春秋七十有八
易簣之際了然不亂葬真定縣新市鄉臨濟村之原娶曹氏

生二子禹功冀州儒學教授次禹謨皆明經學早逝士論惜之孫男曰續禹功子也初以公蔭爲鼓城尉再尉平山歷惠民場管勾監永濟倉支納汴梁行用庫使上都宜興縣尹天歷元年縣陞爲州就命知宜興州事進階承務郎至順三年某月卒年四十九曾孫男二惟仁進義校尉黃陂縣主簿惟義治進士業女一適党某玄孫一德後公葬五十餘年惟仁始請述公墓碑追思先朝故老聲采日遠後生幾無知者故謹摭其遺事而爲之銘銘曰

昔宋之季士習衰繭江漢之間獨有材杰天方混一羣賢並興無閒邇遐其登治平有美硯公來自南服言論雍雍衣冠肅肅周流河朔弗獲寧居學徒從之誦詩讀書公教外邦十

年如始名聞天庭徵車至止曰此老成汝官於鬢士有矜式
國有典型曾無百年故老孰在興文善俗名子攸慨尙述遺
行勒辭刻銘匪貽孫子垂憲後生

滋溪文集卷七

滋溪文彙卷八

碑誌二

靜修先生劉公墓表

靜修先生劉君葬容城縣易水之陰溝市里至正戊子縣尹
賈侯始捐俸買石表諸墓書來請曰先生之歿五十有六年
道德之懿風節之偉固多士之所景仰其墓之寄是邑者旁
無宗人守護彝自下車率僚吏諸生拜而祠之恭修封樹以
限樵牧又將建石琢辭彰示悠久庶來者聞風興起焉天爵
伏念自聖賢之學不傳禮義廉恥之風日泯至宋伊洛大儒
克紹其緒然而廢棄於紹聖禁錮於崇寧而中原已爲金人
有矣方是時士之慕功名者溺於富貴之欲工文藝者汨於

聲律之陋其能明乎聖賢之學嚴乎出處之義者蓋不多見也我國家治平方臻貞元會合哲人斯生有若靜修先生者出焉氣清而志豪才高而識正道義孚於鄉邦風采聞於朝野其學本諸周程而於邵子觀物之書深有契焉惜乎立朝不及數旬享年不滿五十迄今孺子遠人皆知傳誦姓字是豈聲音笑貌所能致歟宜述其德不表於墓奈何先生既歿行業未有紀述故紹作者不能措辭今謹考求遺文掇其出處大節一二而爲之書上稱賈侯尊賢尙德之心乎按先生諱因字夢吉保定容城人世爲儒家五世祖琮生敦武校尉臨洮府錄事判官昉昉生奉議大夫中山府錄事侯侯生秉善金貞祐中南徙其弟國寶登興定進士第終奉直大夫樞

密院經歷秉善生述是爲先生之父壬辰北歸刻意問學尤
邃性理之說獨好長嘯嘗遊西山當秋風木落時作一曲而
感慨係之中統初左三部尙書劉公肅宣撫眞定辟武邑令
以疾辭歸先生將生之夕父夢神人馬載一兒至其家曰善
養之旣覺而生乃名曰駟字夢驥後改今名及字先生天資
絕人三歲識書日記千百言隨目所見皆能成誦六歲能詩
十歲能屬文落筆驚人故國子司業硯公彌堅教授眞定先
生從之游同舍生皆莫能及獨中山滕公安上差可比硯公
皆異待之謂先生父曰令子經學貫通文詞浩瀚當爲名儒
初先生之父四十猶未有子乃曰天果使我無子則已有子
必令讀書故自眞定還居保定謝絕交朋專務教子先生年

未弱冠才氣超卓日閱方冊思得如古人者友之嘗作希聖
解弔荆軻文豪邁不羈之氣可想見也鄉里老儒說經注傳
疏義爲文盡習律賦聞先生講貫閱先生論著始則謗訕久
亦敬服先生杜門授徒深居簡出性不苟合不妄接人保定
密邇京邑公卿使過者眾聞先生名往往來謁先生多遜避
不與相見不知者或以爲傲先生弗恤也王師伐宋先生作
渡江賦以哀之數欲南游江湖覽觀儒先名迹不果嘗愛諸
葛孔明靜以修身之語表所居曰靜修閒遊郎山雷溪又號
雷溪真隱先生京師有曰田尙書者西域貴族頗尙文學聞
先生名厚禮請教其子先瑩以水齧先生謀遷避之不及往
既而易州何公瑋辭兩淮鹽使奉親家居藏書萬卷亦以教

子爲請先生平生苦無書讀又樂易之風土遂允其請三年
卽歸何公贄以銀幣皆謝不受

世祖皇帝自居潛藩收召諸儒講求治道及踐天位姚文憲
公樞許文正公衡楊文獻公果商文定公挺皆列臺省而憲
章文物號盛治者非偶然也久之諸公相繼告成當國者急
於功利儒者之言弗獲進用時先生年雖甚富聲聞已彰中
朝賢士大夫多稱譽之故相文貞王不忽朮薦之朮力至元
十有九年朝政更新有詔徵起先生於家擢拜承德郎右贊
善大夫初 裕皇建學宮中命贄善王公恂教近侍子弟及
恂卒繼者難其人乃以先生嗣其教事未幾母感風疾卽日
辭歸明年母卒治喪合禮二十八年朝政又一更新復遣使

者以集賢學士嘉議大夫來徵先生以疾固辭不起

世祖聞之亦曰古有所不召之臣其斯人之徒歟明年國子
助教吳明陳書於朝薦先生爲國子祭酒士論高之三十年
夏四月十有六日先生終於容城春秋四十有五海內聞之
無不嗟悼曾祖妣邊氏祖妣陳氏妣楊氏繼妣某氏配郭氏
生一子曰和早卒三女皆適名族先生早喪父母事繼母孝
以父祖之喪未葬獻書先友翰林待制楊公恕楊公憐而助
之克襄大事家雖甚貧非其道義一毫不取於人先生師道
尊嚴學子造門隨其材器而教焉講說諸經理明義正聽者
心領神會初朱子之於四書凡諸人問答與集注有異同者
不及訂歸於一而卒或者輯爲四書集義數萬言先生病其

太繁擇爲精要三十卷簡嚴粹精實於集注有所發焉有詩
五卷號丁亥集先生所選常自諷詠復取他文焚之今所傳
文集十餘卷得於門生故友然不爲空言皆有補於世教其
他小學四書語錄亦皆門生所錄惟易繫辭說乃先生病中
筆之親授其徒者也先生每以後世史官不明義理修辭之
際輕爲增損使忠臣義士之心不得暴白於世嘗曰若將字
字論心術則受屈者多矣先生之亡未久吳明復進言於朝
曰風俗之薄久矣士之處世不自貴重聞人譽己喜見顏色
不復知有廉恥等事何則欲動於中利奪於外故也伏見故
處士劉因隱居教授不求聞達授以三品清要之官辭而不
顧若蒙賜諡贈官庶幾息奔競悖風化士類知所懲勸焉延

祐中始贈先生翰林學士資善大夫上護軍追封容城郡公
諡文靖是後中外風紀儒臣皆以先生礪俗興化有功昭代
宜如許文正公從祀孔子廟廷禮官會議亦皆曰可而當路
者未遑及也嗚呼天之生賢也豈無義乎自義理之學不競
名節墮頽凡在有官見利則動有國家者欲圖安寧長久之
計必崇禮義廉恥之風敷求碩儒闡明正學彰示好惡之公
作新觀聽之幾使人人知有禮義廉恥之實不爲奔競僥倖
之習則風俗淳而善類興朝廷正而天下治

世祖皇帝再三聘召先生者其以是歟天爵之生也後不獲
見先生及游成均得臨川吳文正公澄爲之師吳公於海內
諸儒最慎許可獨知尊敬先生豈其學問出處道同而志合

歟當國朝龍興之初歲在己酉二月先生生於保定吳文正公亦以是歲正月生於臨川是時南北未一天已生斯大賢他日輔贊國家文明之治吳公年八十餘方終著書立言盛傳於世先生早歲去世雖不及大有著述然風節凜凜天下慕之扶世立教之功大矣賈侯由進士入官治邑有聲獨能訪求先賢遺跡而表章之其於風勵俗化惇崇名教誠非小補云

元故集賢學士國子祭酒太子左諭德蕭貞敏公墓誌
銘

大德延祐閒關陝有大儒先生曰蕭公同公篤志勵操高蹈深隱鄉郡服其行誼士類推其學術朝廷重其名節於是徵

車起之表率俗化其道德風流迄今天下慕之至正甲申之
春天爵來官西臺訪求二老言行將以爲師法焉旣而得同
公墓銘讀之起敬起歎蕭公云亡久矣猶未有述乃稽核薦
揚徵召公牘於省府采摭族世薨葬歲月於其家問其隱德
懿行於舊老名士之所傳錄其遺文雜著於金石簡冊之所
載合而誌之以銘庶後世攷德者有徵焉謹按蕭氏益都人
國初著籍京兆諱鰲字維斗年二十餘郡守以茂才推擇爲
掾未幾新郡倅至倅西域人怒則惡言詈吏公歎曰如此尙
可仕乎乃置文書於案卽日謝去隱於終南山下鑿土室以
居之盡得聖賢遺經以及伊洛諸儒之訓傳陳列左右晝夜
不寐始則誦讀其文入則思索其義如是者餘三十年義理

融會表裏洞徹動容周旋咸中禮節由是聲名大振

世祖皇帝既一四海而遐荒小邦橫目窮髮悉皆來廷命開
祕府詳延天下方聞之士撰述圖志用章疆理一統之大使
者來徵公辭焉故贈咸寧貞獻王野仙鐵木兒親授學於許
文正公深知治國用賢之說及爲陝西行省平章登公并故
四川憲副劉季偉姓名於朝會參政趙彥澤請立提舉學校
官薦公可當其選久之制下授公承務郎陝西儒學提舉蓋
從貞獻王及趙公之言也省憲請公就職公以書辭曰某蚤
事文墨見一時高才捷足趨事功者效之不能是以安於田
畝讀書爲事本求寡過不謂名浮於實聖恩橫加竊念聖人
之教必明德而後新民成己乃能成物昔夫子使漆雕開仕

對以吾斯之未能信然則心術之微雖聖師不若開自知之
審今某學行未至自知甚明望達廟堂改授真儒則朝廷得
人學者得師某亦不失爲寡過之人矣大德七年冬超擢集
賢直學士奉訓大夫國子司業遣使徵之公又力辭不拜其
言曰念某寡陋與人其學非敢爲師向授提學幸蒙聽允其
辭旣不能當外郡學職豈復可預國學之事況敢辭卑居尊
以取無廉恥貪冒之罪乎九年夏制若曰蕭維斗山中讀書
不貪官不嗜利

世祖徵召不至朕遣人召之亦不至豈將命者非其人而弗
來歟今特命參議中書省事廉恆等以往其令行省給五乘
傳賜之楮幣百匹命挈其家偕來或蕭維斗堅欲不仕可進

嘉言一二朕當令人送還如年老或不能騎別給安車可也
行省行臺諸司所在敦遣公辭不獲力疾北行適

成廟不豫然猶傳敕俾擇館舍遣近侍賜餼廩衣物又命宰
執以治道爲問公尋亦南歸仍辭所賜不受十年進集賢侍
讀學士少中大夫卽其家授之明年武宗臨御

仁皇養德東宮博選當世名儒左右輔導特授公嘉議大夫
太子右諭德命宮師府長史聶輝起公敦迫上道至大元年
二月至京入見嘉禧殿

仁皇溫問再三公書酒誥以進因言古人惟祭祀則飲酒然
尙德將無醉蓋當是時近習多侍上燕飲故公首以是訓陳
之未幾懇請還山上憐其衰老遣使送歸二年四月徵拜集

賢學士國子祭酒依前太子右諭德進階通議大夫公以老疾辭門人疑焉問曰聖人樂得天下英才而教育之今先生辭祭酒者何也公曰曩在京師有朝士再三以成均教法爲問者余告之曰若欲作新胄子當罷歲貢一如許文正公時專於教養彼既外無利祿之誘內有問學之功則人材庶有望矣此語一傳物議鼎沸執政者亦深不以爲然今余出則徇人豈能正己以正人乎四年正月尙書省臣皆以罪廢政務復歸中書而大臣請曰今政事大壞當從新治之中外廉潔老臣及事

世祖成廟兩朝有若李謙尙文趙居信劉敏中蕭剡程鉅夫郝天挺韓從益劉正程鵬飛董士選陳天祥王思廉等可急

遣使召之其議新政

仁皇從之公以疾辭不起延祐五年七月己未有星隕于所
居中庭光射如晝越八日丙寅公以疾薨春秋七十有八八
月某甲子葬咸寧縣少陵鄉朱張里南原先塋之昭至治三
年門人故四川行省左丞廉公惇浙江行省參政李朮魯公
翀時方在朝以公易名爲請制贈資善大夫四川等處行中
書省左丞追封扶風郡公諡貞敏維闕輔自許文正公楊文
康公鳴理學以淑多士公與同公接其步武學者賴焉公之
學自六經百氏山經地志下至醫經本草無不極通其說尤
邃三禮及易嘗作家廟以奉先世祭則極其誠敬子弟或少
有怠祭已必深責之早值親亡哀毀致疾治喪不用佛老棺

柳衣衾悉遵禮制蓋自楊文康公倡於其始公復推明於後
至今長安士大夫家亦多化之公平生不祭於墓有築亭於
先壟之側者表曰致慤引祭義以明之公曰墓祭非古當作
祠堂於其家揭斯名於齋室庶乎其可瀛川吳文正公獨稱
公爲善於禮初江西儒者標題小學書行於世公閒以朱筆
塗之曰凡今標題多朱子所不欲存者如鄧伯道繫其子於
樹之類吳文正公是之公深通六書嘗言自古文篆籀而後
小篆佐隸至於真楷相沿而成故今楷書中古籀篆隸皆有
之雖行草亦有古籀篆隸之遺意今真書點畫之訛者皆從
隸草行草中來非兼通者不能知也小篆自是省古籀而爲
之攷諸鐘鼎款識遇重事則變之要之不失六書之旨太常

博士侯均曰今人識字及通六書者惟蕭公爲然關中字學不差亦因公發之也公嘗書經史格言以訓人求書者或非其人及涉異端之事則拒絕之家多藏書手自校讎或經傳音訓之訛皆字字而正之下至文史亦然爲文悉本諸經非有裨世教者不言非其人不與公薨遺落無幾今購得古今詩若干首銘贊雜文序記碑誌又若干首翰林姚文公燧文蓋當代慎許可獨敬禮公其門生有譏詆公文者姚公怒曰蕭先生道德經術名世者也豈若吾輩以雕蟲篆刻爲工乎所撰九州志若干卷法史記年表由三代迄宋金詳疏沿革於下山川貢賦附焉其他著述又若干卷天歷兵荒之餘往往散在民家公少穎悟三四歲時從其姊過親族家引公坐

榻上不從親族固命之乃坐榻下人已異之既長慨然有志於天下歲癸卯秋河東關中地震月餘不止父老憂懼不知所以相帥問公公告之者數千言反覆極論天人一理性本皆善國家當務教養俾復其初人當恐懼修省日還於善則陰陽和而萬物遂災害自不生矣其心蓋欲天地育萬物上躋隆古之盛是豈離世絕倫索隱行怪者之流歟初朝廷以貢舉取士行省禮請公與同公較其藝公以斯文方興出而應之公讀書之暇躬親農畊蠶桑嘗教其子孫曰治此以供衣食最爲安爾或有餽遺非義不取人有急難施不少吝奉養極其澹薄公身長六尺修髯如畫望之可敬其爲人外和而中剛凡與人交接之以溫言悅色胸中黑白瞭然不溷間

入城市觀者如堵當代名公卿及四方之士宦游於秦者願一見公爲榮或數造其廬請教焉西臺大夫伯篤公嘗以冬月謁公汗流浹背出語人曰吾久在京師屢接賢士大夫未有若蕭先生自然令人敬愛不舍公教人極嚴諸生惴惴畏服其學皆自小學始次及四書諸經日與學者講說經訓滾滾不窮待其曉解方授別義人來質疑卽命其徒取某書某卷所載以對曰若背文暗誦恐或誤人初李朮魯公至自南陽從公受業久之謂人曰某游江右獲識諸老聞其議論或有不讓今見蕭先生使某自不能措一辭信知吾道之無窮也其他弟子若同毅陳營智炳李材盧烈等多知名於時公德善化及遠邇雖武夫悍卒亦知景慕征西兵嘗屯長安大

帥一日入朱張里里人驚惶帥諭止之曰汝勿怖聞此有蕭先生者見之卽歸吾非侵擾汝也有郡史乘馬城南暮歸遇盜逐之吏思所以自解曰我乃蕭維斗也盜卽引去未幾盜獲吏適按之盜曰我向欲劫汝騎汝以爲蕭維斗也吾故不忍寧知汝給我耶公四世祖諱雲宋樂安鹽使曾祖諱惠彥金益都府孔目官祖諱均皇贈中奉大夫河東山西道宣慰使護軍河南郡公考諱瑜才而略金李轉徙陝洛之郊屢佐戎幕活人有功終京兆路總管府經歷因留家焉徵士韓擇爲誌其墓贈資善大夫大司農卿上護軍河南郡公曾祖妣蓋氏祖妣孫氏追封河南郡夫人妣張氏遂氏俱歿於兵周氏張氏並追封河南郡夫人配楊氏張氏杜氏俱先卒張氏

亦追封河南郡夫人子男二曰友早卒曰恭終奉議大夫耀
州知州女五俱適人孫男三元終進義副尉涇陽縣主簿次
亨次儀嗚呼節義天下之大閑有國家者欲以作興風教振
起名節則必訪求高人逸士徵而用之於以登禮樂之治惇
廉讓之風彼爲士者非偃蹇以自媚矯亢以爲高蓋不如是
則道不尊觀

列聖之所以用公公之所以自處則朝廷風勵人才之盛君
子進退道義之隆可以爲後世之楷範矣銘曰
節彼終南有堂有紀誰其居之曰隱君子早捐世務樂乎幽
潛德蘊於身士具爾瞻南山之雲朝隕於穴雨澤誕施澡我
名節

天子曰咨有臣如斯安車載脂屢往徵之公拜陳辭能薄材
庸誤達天聰臣非連蹇安車西來道德雍容羣工在列仰止
高風進敷正言退明正學垂訓後生克配先覺去古日遠士
習愈偷媿嬰骹散合汗同流一聞薦揚喜溢顏面遯世弗悶
百未一見不有君子孰障頽波尙思公存考槃在阿言爲世
則行爲世軌流風遺烈來者興起南山蒼蒼下爲公藏爰述
潛德百世耿光

元故中奉大夫江浙行中書省參知政事追封南陽郡

公諡文靖李光魯公神道碑銘

并序

公姓李光魯氏諱翀字子翬年出二十號稱鉅儒由憲府薦
授襄城學官汴省右丞廉公恂辟掾擢汴學正朝廷聞其

名召爲國史院編修官未幾御史臺辟掾又辭臺臣高之奏
爲河東道廉訪司經歷遷陝西行臺御史階將仕佐郎入拜
監察御史延祐五年擢中書右司都事會權相用事公退居
濟之新鎮改翰林修撰鄆忠獻王柏柱爲相復薦公左司都
事轉從仕郎尋陞右司員外郎泰定初充會試考官遷國子
司業歲餘除河南行省左右司郎中遷燕南道廉訪副使入
僉太常禮儀院事尋陞奉訓大夫兼經筵官至順元年同知
禮部貢舉拜漢中道廉訪使久之遷太禧宗禋院事兼祇承
神御殿事改集賢直學士兼國子祭酒應召赴上都議事又
兼經筵官進中順大夫禮部尙書元統二年進中奉大夫拜
江浙行省參知政事以葬親北歸復號至元元年召拜翰林

侍講學士知制誥同修國史以未葬辭明年復命編修官成
遵召之而疾不能行矣公之先女眞貴族泰和中章宗命定
氏族爲百孛朮魯氏其一望著廣平公會祖阿納尼金符離
令妣石抹氏祖德國初官忠顯校尉南京路漢軍總把累贈
昭勇大將軍前衛親軍都指揮使上輕車都尉追封南陽郡
侯妣南陽郡夫人成氏考居謙累賜中奉大夫河南行省參
知政事護軍追封南陽郡公妣南陽郡夫人王氏公世居上
京之隆安昭勇公初從

憲廟南徙以保甲射生壯總軍把戍鄧之順陽川因家焉初
至元己卯郡公從故相賈公居貞掾江西宣闡公生顛江舟
中於時釜鳴家人驚異昭勇愛公穎悟嘗曰是兒必興吾家

稍長讀書一覽卽記郡公以順陽僻左徙居於鄧貞隱李先
生鄧名士也公從學詩賦同門莫及郡公卒家益貧婁進修
愈力翰林閻宏曰觀子之才後必名世曷遠遊以廣見聞公
往江西謁克齋蕭君某蕭君故宋大家夜夢大鳥集所居屋
翼覆院外疾出視之冲天而去釐明公至蕭君異之公始名
思溫字伯和爲製今名及字歸復走京兆拜集賢蕭貞敏公
貞敏隱終南爲學精勤夜以繼晝公寓其旁僧舍攻苦食淡
人不能堪公裕如也歸復游漢上從翰林姚文公學古人文
公奇之以書抵真隱曰子輩談論鋒出其踐履一以仁義爲
準文章不待師傳而能後進無是倫比於是貞隱以女妻公
公之爲學務博而約自六經諸史傳注下至天文地理聲音

歷律水利算數皆考其說聽其言論滾滾不窮故聲聞大振
自官汴學士之從者日眾及師成均與鄧公文原虞公集謝
公端爲同時教人不倦發明經旨授引訓說累數百言極於
至當而後已學者恐不卒得聞故經公指授者多知名公佐
河東或訟冀寧監郡不法其憲長曰監郡貴胄宜詳讞之蓋
欲緩其事公曰我第知有憲法焉知爲貴胄乎卒正其罪關
陝有警郡民驚惶蒙古萬戶提兵赴河中道出冀寧公白憲
長曰是郡要衝當留兵鎮守萬戶難之公曰有責在吾不汝
累也郡賴以安應州大興土木之工公言兵後宜蘇民力朝
廷爲罷其役土番之民以飢來告

天子憐憫命出內帑錢振之公以西臺御史承命而往民賴

其惠及遷內臺適
英王初正儲位公言當選正人朝夕輔道制可公分行淮東
體察憲人能否准憲尙嚴刑庭列獄具甚眾公曰國家置風
紀本以肅清貪污興行治化初不專尙刑也取獄具焚之南
陽設六屯田各樹官屬腴削其民民不能堪故多流亡公請
罷去官屬俾有司董其佃作公在省闈左相鄆忠顯王以公
端重博洽甚加敬禮王嘗謂公曰汝能作宰相否公對曰宰
相之位故不敢當然平昔所學皆宰相事蓋聞有福德才量
者乃能爲之因爲王陳其說王曰微公我不聞是言權相既
死王進右相君臣親密無閒慨然欲復祖宗之治上畋易州
聞王之曾祖魯忠獻王安童賜田賜碑在邇乃往觀焉敕設

燕享王稱觴獻壽上大悅明日公進駐蹕頌敷言忠獻王輔
相

世廟統一六合修舉百度治底雍熙以箴規焉上覽之命以
駐蹕表其里英皇崩王亦遇害逆黨列據津要公移疾不
出晉邸遣使誅其逆黨公卽起視事泰定間數有天變地震
水旱之異時相多西域人西域富商以異石爲寶誑取國帑
又其私人多以貪墨奪官吏弗克敘用皆有怨言故致災變
若此

天子信之因肆大赦播告多方蓋彼內以私結其黨與外以
取悅於姦貪公時爲燕南憲副力陳其不可他憲雖亦有言
皆依違護不若公言明白剴切已而事果不行公讞囚保定

河閒民犯私鹽法當運司治罪公以民權飢寒誤觸刑禁皆隨事治之佐吏以爲難公弗恤也囚有在獄久不決者公察其情可杖杖之可釋釋之眾皆以爲平允岐山周公廟道士據之公曰周孔名教炳如日月豈宜列於異端請設書院令學官主之 文宗入京首謁太廟既卽位又行祫饗大禮公攝禮儀使咫尺天顏上有所問執禮以對上悅上建太禧宗禋院崇奉

祖宗神御若家人禮又建奎章閣學士院陳列圖書日覽觀焉兩院官屬學士皆上所自擇勳舊文學親書其姓名付中書以行文書銓曹不敢進擬公旣選僉太禧而奎章偶闕大學士員近臣乘閒以某官爲言上怒曰汝何不薦魯子翬馬

伯庸而以斯人爲言乎公之見知類如此武宗廟室未有配位大臣請用並祔之文公曰宣慈惠聖皇后昔受寶冊母儀天下禮當合食於廟其後卒從公議今上卽位議者以比年恩澤太頻不宜肆赦公曰

皇上以聖子神孫入繼大統當令臣民視聽一新不可斂怨於國遂赦天下賜公白金百兩金綺二端楮幣萬緡初國子生以入學名次爲先後歲貢補官殊無勸懲故太史齊公履謙爲司業請以學業爲陞齋等第以積分公試文詞優者爲中選由是諸生成思奮勵而人才興矣後值天歷多故其法中輟公爲祭酒始試諸生於崇文閣下中選者凡若干人先時學官多僦民舍以居監有隙地在居賢里公曰古者教有

業遊有居乃積弟子入學費禮得楮緡二萬有奇爲宅數區築室完美以居師生帝帥至自西方敕百官郊迎公卿膜拜延觴師坐受之公立以觴進曰師釋迦徒天下僧之師也余孔子徒天下士之師也師笑而起舉觴卒飲觀者凜然時相將封秦王事下禮部議公曰秦大國也非宗王不可今丞相食邑高郵高郵驛名秦淮非秦地也宜以淮易之眾伺相意不悅因其請曰詔已命封於秦不當別議有官平章者卒其妻盡以田施僧寺云爲平章祈福妾子求訴於公其妻曰平章名爵子蔭足矣所施家貲幾何公曰汝旣無嗣而反蕩其家資異日何顏見汝夫於地下命以田還其子廷議是之江浙地大事劇而省臣煩苛事多壅積民以爲病公曰職居大

藩而欲吹毛求疵居下者無所措手足矣事至卽決民大稱
頌公爲文章嚴重質實不爲浮靡其詞悉本諸經如米粟布
帛皆有補於世教有菊潭集六十卷太常典禮因革不同每
遇禘享輒稽吏牘故多牴牾公請於朝賜筆劄廩膳倡禮官
彙集爲書七十五卷公欲於順陽建博山書院以淑其人分
遣六齋曰治理治事經學史學書學數學方經營之而疾已
革遺言喪祭一本於禮勿事夷鬼以至元四年三月某甲子
薨於順陽味經堂享年六十訃聞制贈通奉大夫陝西行省
參知政事護軍追封南陽郡公諡文靖是歲四月庚寅葬鄧
之永昌鄉西樊里四望山下配李氏貞隱先生之女儼雅儉
勤治家有法親供蠶績而無富貴之習累封南陽郡夫人以

至正元年五月某甲子卒於順陽稼穡堂享年五十有三
是歲閏五月甲申合葬公墓子男曰悲力學有聞今祕書監祕
書郎嗚呼士之於世也愿謹者人多以爲迂倜儻者人則以
爲狂底厲名號者反以爲矜通達時變者或以爲譎甚矣爲
士之難也公學識卓異不隨流俗俯仰論議設施多有可述
而淺見狹聞者或未能盡識也然士之特立獨行豈以求合
時好爲賢乎臨川吳文正公嘗曰李朮魯公學博而王獨立
無朋聞者以爲知言銘曰

金有中原治安百年設爲貢舉網羅才賢聖元方隆遺士接
踵臺閣彬彬尙賴其用故老寢亡惟公挺生淵淵其蓄涵涵
而停江漢之間河華之右爰有碩師爲世領袖公從問學堅

苦不渝華聞日照衣冠偉如洙泗遺經伊洛訓傳講說精深
義理融貫踐敷臺閣畫贊相臣言論之卓風動搢紳翼翼成
均公正師度敷教以寬多士作則中朝典禮外省自宣有倫
有要惟經惟權士之立朝貴有學識議事以制匪學何式瞻
彼東土金人肇興既定危亂遂登治平文物聿彰人材斯出
惟公之先喜事儒術積善儲慶益大以振公學有源力相斯
文繼世克承箕裘是業表公儒行允配前哲

滋溪文彙卷九

碑誌二

元故太史院使贈翰林學士齊文懿公神道碑銘

世祖皇帝既奠大位定百官之儀新一代之制治歷以授民
時建學以教胄子其謀猷師表之重乃以屬諸中書左丞許
文正公文正既沒繼者遵守其舊若夫見而知之卓有學識
通制作之本原酌時宜之損益則惟太史齊公其人哉公諱
履謙字伯恆大名入少從考府君來京師受學家庭讀書一
過輒記年十一學推邵星歷十三習詞賦府君曰汝欲爲進
士歟能明經術則聖賢可學公遂研窮性理非洙泗伊洛之
書弗好也國家襲金用大明歷歲久弗與天合至元十三年

詔立太史局改治新歷尋升局爲院公年十七補星歷生同
輩多司天世家子忌公才能太史王公恂召問算數皆不能
對獨公隨問隨答王公稱之許文正公揚文康公俱應詔治
歷公侍左右數請益焉歷成與修歷經歷議二十八年太史
郭公守敬奉詔浚惠通河荐公爲星歷教授奏凡儀象未完
者命公完之都城刻漏以不爲之其形如碑中設曲筩範銅
爲丸自碑首傳行而下擊繞以爲節旣久廢壞晨昏愆度公
按圖考訂蓮花寶山漏製俾工改爲訖今用之遷平秩郎保
章正始掌歷官之政大德三年八月時加巳依歷日食二分
六十六秒已而不食眾懼公曰當食不食在古有之矧時近
午陽盛陰微因列唐開元以來日當食不食者以聞六年六

月朔時加戌依歷日食五十七秒眾以涉交既淺且復近濁
欲不以聞公曰吾所掌者常數也其食與否則係於天及時
果食日官爭沒日術弗能決公曰氣本十五日閒有十六日
者餘分之積也故歷法以所積之口命爲沒日則沒日不出
本氣者爲是眾從其議七年八月二十三日夜地大震詔問
致災之由弭災之道公按春秋言地者爲陰而主靜妻道臣
道子道也三者失其道則地爲之弗寧是時

成廟寢疾宰執有作威福者故公言及之九月冬初立南郊
禮

昊天上帝公攝司天故事司天雖掌時刻而無鐘漏往往將
且行事公請自今用鐘漏俾早晏有節則人咸知起敬從之

十二年春

武宗皇帝自北藩入繼大統

太后命卜卽位日期公曰

帝王卽位具有典禮漢文帝至自代邸以其日日夕卽位豈宜拘以禁忌誤大計耶至大二年奉常請修社稷壇及浚太廟庭中井或以歲君所直欲止其役公曰國家以四海爲家歲君寧尚在是乎湖廣民家生子數歲身足下有毛行省以爲瑞貢之公曰此異類所產不可以見三年陞授時郎秋官正兼領冬官正事

仁宗自居潛宮嘉尙儒術及其卽位學校貢舉之制興矣臺臣屢薦公當爲冑子師宰相李韓公承

上意拔用名士擢國子監丞易階奉直大夫公嚴條要以身先之諸生惴惴畏服說經精明質疑請問殆無虛日諸生齋居者休旬無所于食公積學廩之贏與之夜給膏油繼之公每五鼓入學風雨寒暑未嘗懈也改僉太史院事皇慶二年春彗出東井公廷奏古者楚惑犯心宋景公反身修德熒惑退舍今當修省以弭天災因陳時務入事曰除舊布新進賢去邪省刑輕賦節用愛民

上改容傾聽明年復拜國子司業有制國子歲貢六人蒙古二官從六品色目二官從七品漢人二官從七品第以入學名籍爲差次公曰不變其法士何由進學國何以得材乃酌舊制立陞齋積分等法其言曰國學立六齋下兩齋以初學

者居之中齋治大學論語孟子中庸學詩者居之上兩齋治
易詩書春秋禮記屬文者居之每季考學問進者以次第陞
又必在學二年以上始與私試孟仲月試經義季月試策問
古賦制誥章表蒙古色目試明經策問辭理俱優者爲上準
一分理優辭平者次之準半分歲終積至八分者充高第以
四十人爲額員不必備惟取實才然後集賢禮部試其藝業
及格者六人以充貢諸生三年不能通一經及在學不滿半
歲者並黜之中書奏行其法於是人人厲志讀書益多材學
之士矣久之出知濱州丁內艱不果上終喪超拜太史院使
階朝散大夫至治之季司天以誤卜日下吏公曰陰陽之說
多端未始會歸於一彼星官疇人各專家學弗知通貫豈有

心而然哉由是獲免泰定二年選充江西福建道奉使宣撫
江西俗頗譁訐獄訟滋章姦人因緣爲市公訊之以情皆隨
事決遣泉漳戍兵逞威肆暴凌蔑郡縣長吏或白晝劫民財
公痛繩之以法初括江南地時民或無地輸稅或地少輸多
曰虛加糧江西尤甚詔諭憲司覆實蠲免久弗施行公曰
上欲澤加於民而憲司格之何也旣杖屬吏俾憲使親行覆
實免糧若干萬石聞憲職田每畝歲輸米三石民率破產償
之公命準令送官其地左不能致者以秋成米價輸其直福
建鹽漕分司古田江口商旅過者被擾公罷之福清富民千
家妄稱煮鹽避役公皆民之閩多先賢子孫或同編戶服役
公悉除之凡黜罷貪吏四百餘人興利除害數百事民大稱

快天歷二年九月十有六日公以疾薨享年六十有七公平
生寡言笑不妄交游儀貌奇偉望之儼然爲學堅苦家貧借
書讀之及在太史會朝廷輦宋三館圖籍置院中公晝夜誦
讀精思深究故其學博洽而精通自六經諸史天文地理禮
樂律歷下至陰陽五行醫學卜筮無所不能而於經術爲尤
邃立言垂訓簡易明白不蹈故常以徇人不求新奇以驚世
其於聖賢旨意蓋多有所發焉所著易本說四卷繫辭旨略
二卷蔡氏書傳詳說一卷春秋諸國統紀六卷大學四博小
注一卷中庸章句續解一卷論語言仁道旨二卷皇極經世
書入式一卷外篇微旨四卷授時歷經串演撰八法一卷二
至晷景攷二卷遺文若干卷公嘗言國家治平百年禮樂多

沿舊制蓋樂本於律律本於氣當擇僻地爲驗氣密室取金
門之竹河內葭莩多方候之可以正樂音同度量列其事上
之又得石律管一長尺有八寸外方內圓中有隔隔有小竅
蓋以通氣隔上九寸其空均直徑三分以應黃鐘之數隔下
九寸迤邐殺至管底徑二寸餘蓋聚其氣而上之疑卽古沙
謂玉律者也旣而公遷他官事遂寢臨川吳文正公覽公著
述爲之敬服屢歎當世無知公者公薨贈翰林學士資善大
夫上護軍追封汝南郡公諡文懿祖政贈中奉大夫護軍考
義贈資善大夫上護軍俱追封汝南郡公祖妣劉氏妣蔡氏
俱追封汝南郡夫人配張氏封汝南郡夫人子男克明世業
業終候儀郎保章正女適知邗州申克強孫男某公母弟思

恭蚤游成均有文名由京學官入教國子歷升冀寧之榆
光之固始安之高陽並著能稱今以奉訓大夫國子監丞致
仕至元九年二月甲子監丞買地京城齊化門東大路之陽
奉考府君及公葬焉以天爵少從公學故以墓隧之文見焉
嘗觀漢碑門生爲師作者居多又載人各出錢幾何其相其
役顧天爵迂疏何以有此謹述公歷官治行論著生卒而爲
之銘銘曰

經世之學本諸儒臣孰啟其原六籍三墳明乎天人達乎物
理成已成物罔不由此巍巍

世皇撫有萬邦建官任人治具畢張周覽乾象攸正歷紀爰
立膠序樂育多士一時鴻碩曰許與楊亦有羣英作式四方

公學堅苦博觀載籍於易春秋獨探其頤入師璧雍時詠書
我勩其學徒以弦以吹由司星歷進太史職率其官屬推步
勿惑在昔唐虞民底時雍三光以全五典克從羲和授時司
徒典樂於皇我朝惟古是儆

世皇在御百度惟新匡飾治化無競惟人禮樂百年是圖是
究允懷先哲不尙有舊都城之東鬱鬱新阡碑無媿辭過者
式焉

元故翰林侍講學士知制誥同修國史贈江浙行中書
省參知政事袁文清公墓誌銘

國家有文學博洽之儒翰林侍講學士袁公諱桷字伯長慶
元郵縣人也故宋少傅同知樞密院事資政殿大學士贈太

師越國公諱韶之曾孫中散大夫知嚴州軍州事 皇元贈

嘉議大夫禮部尚書上輕車都尉會稽郡侯諱似道之孫朝
列大夫同知處州路總管府事贈中奉大夫浙東道宣慰使
都元帥護軍會稽郡公諱洪之子年二十餘憲府薦茂異於
行省授麗澤書院山長不就大德初羣賢萃於本朝聞公才
名擢翰林國史院檢閱官秩滿陞應奉翰林文字同知制誥
兼國史院編修官遂遷修撰凡歷兩考遷待制又再任進拜
集賢直學士久之移疾而還復遣使召入集賢仍直學士未
幾改翰林直學士知制誥同修國史明年遷拜侍講積階奉
議大夫泰定初辭歸四年八月三日以疾終於家享年六十
有二是歲十有一月某日葬鄞縣上水慶遠輿之原訃聞制

贈中奉大夫江浙等處行中書省參知政事護軍追封陳留郡公諡文清維袁氏遠有世序宋嘉祐閒有諱毅者舉進士歷官朝奉大夫知處州其後龍圖閣學士正獻公燮兵部尙書正肅公甫父子俱號名儒越公於祥符丞毅爲曾孫師事正獻尹臨安十餘年爲政嚴明事載之史公生富貴爲學清苦讀書每至達旦長從尙書王公應麟講求典故制度之學又從天台舒岳祥習詞章旣又接見中原文獻之淵懿故其學問核實而精非尙事記覽譁眾取寵者所可擬也

世祖皇帝初得江南故宋衣冠之裔多錄用之而宣慰公屢被命恩公在館閣一時耆舊若閣公復程公鉅夫王公構雅愛敬公故蒙薦擢時海宇乂安年穀豐衍而詞林清華無官

守言責日維撰著爲職朝廷有大制作公從諸老獲議其事
成宗皇帝初建南郊公進十議曰天無二日天尤不得有二
五帝不得謂之天作昊天五帝議祭天歲或爲九或爲二作
祭天名數議園丘不見於五經郊不見於周官作園丘非郊
議后土社也作后土卽社議三歲一郊非古也作祭天無閒
歲議燔柴見於古經周官以禋祀爲天其義各旨作燔柴泰
壇議祭天之牛角繭栗周牲於郊牛二合配而言之增羣祀
而合祠非周公之制矣作郊不當立從祀議郊質而尊之義
也明堂文而親之義也作郊明堂禮義異制議郊用辛魯禮
也卜不得常爲辛作郊非辛日議北郊不見於三禮尊地而
遵北郊鄭玄之說也作北郊議禮官推其博多采用之

仁宗皇帝自居潛宮深厭吏弊及其卽位乃出獨斷設進士科以取士貢舉舊法時人無能知者有司率諮於公而後行及廷試公爲讀卷官二會試考官一鄉試考官二取文務求實學士論咸服公在詞林幾三十年扈從於上京凡五朝廷制冊勦臣碑版多出其手嘗奉詔修

成宗 武宗 仁宗三朝大典至治中鄆王柏柱獨秉國鈞作新憲度號令宣布公有力焉詔繪王像命公作贊賜之公述君臣交修之義以勵王王尤重公學識銳敏欲撰述遼宋金史責成於公公亦奮然自任條具凡例及所當用典冊陳之是皆本諸故家之所聞見習於師友之所討論非牽合剽襲漫焉以趨時好而已未幾國有大故事不果行公沒二十

餘年今天子特敕大臣董撰三史先朝故老存者無幾眾獨於公追思不忘會遣使者分行郡國網羅遺文古事而江南舊家尙多畏忌祕其所藏不敢送官公之孫同知諸暨州事曦乃以家書數千卷來上三史書成蓋有所助初

世祖建宗廟於京師至

仁宗崩七廟已滿乃結綺爲室以祔

英皇親行祫享之禮始議增廣廟制乃作新廟爲十五室公亦預其議公會祖妣陳氏封周國夫人祖妣王氏妣史氏楊氏元配鄭氏並追贈會稽郡夫人子男二人瓘瑾女四人長適同知袁州路總管府事趙孟貫次適故觀文殿大學士趙某孫由錫次適故相史忠定王玄孫公偕次適處州儒學錄

下應渠孫男職以公蔭入官既進遺書於朝遂擢祕書監著作郎次暉叟孫女適浮梁州判官范理次許適陳某次幼曾孫男二公生七日史夫人卒長事郡公極孝教子孫有法待宗族盡恩義中外姻婭皆宋名族家庭嚴肅吉凶之禮不廢其舊規每以務學修行勗故密子弟俾自愛重無爲門戶羞公喜薦士士有所長極口稱道公之南歸會史館將脩

英皇實錄令中書左丞呂思誠翰林直學士宋褰河南行省參政王守誠皆新擢第公薦其才堪論撰天爵與焉公於近代禮樂之因革官闕之遷次朝士大夫之族系九流諸子之略錄悉能推本源委而言其歸趣袁氏自越公喜藏書至公收覽益富嘗曰余少讀書有五失泛觀而無擇其失博而寡

要好古人言行意常退縮不敢望其失懦而無立纂錄故實
一未終而屢更端其失勞而無成聞人之長將疾趨從之輒
出其後其失欲速而好高喜學爲文未能畜其本其失又甚
者也公之斯言深中學者貪多苟且之弊公爲文辭奧雅奇
麗日與虞公集馬公祖常王公士熙作爲古文論議迭相師
友閒爲詩詩倡酬遂以文章名海內士咸以爲師法文體爲
之一變公有易說若干卷春秋說若干卷清容居士集五十
卷嗟夫昔宋南遷浙東之學以多識爲主貫穿經史考覈百
家自天官律歷井田王制兵法民政該通曲委必欲措諸實
用不爲空言然百年以來典刑風流日遠故公之葬謹序而
銘之來者尙有所徵乎銘曰

懿歟袁公博極羣書矢辭淵淵佩玉舒舒海宇旣一興自江
左諸老見之孰不曰可進掌帝制列官詞林討論憲度講求
古今於時朝廷日興典禮祖廟天郊以享以祀三聖信史彙
述宏休羣士選舉務拔其尤不有學識孰承其責惟公雍容
斟酌損益陳編墜簡公證其訛識時歸休山林浩歌世有鄙
夫空空如也覆息多能係時用舍公富著述燦若日星銘詩
弗刊垂後是程

元故資德大夫御史中丞贈摠忠宣憲協正功臣魏郡
馬文貞公墓誌銘

至元四年戊寅三月丙午資德大夫御史中丞知經筵事馬
公薨於光州居第正寢有司以聞制贈摠忠宣憲協正功臣

河南江北等處行中書省左丞上護軍追封魏郡公諡文貞
其年四月壬申葬郡城之北平原鄉西樊里公諱祖常字伯
庸世本雍古部族居靜州之天山四世祖錫里吉思金季爲
鳳翔兵馬判官死節贈恆州刺史祀褒忠廟官名有馬子孫
因以立氏曾祖月合乃從

世祖皇帝伐宋留汴饋饗六師卒官禮部尙書贈推忠宣力
翊運功臣僉樞密院事諡忠懿侯祖世遑行尙書省左右司
郎中贈嘉議大夫吏部尙書父潤朝列大夫同知漳州路事
贈中奉大夫河南行中書省參知政事封梁郡公母梁郡夫
人楊氏公幼有異稟年六七歲卽知讀書歲時拜賀長者以
錢賜之他日行過市中悉以買書十歲侍梁公宦游儀眞月

列列燭於庭燭欹側延燒屋壁公解衣沃水撲滅梁公走視
火已收止問其故對曰恐驚長者蜀儒張公頌講學儀真公
時求冠質以經史疑義數十張公奇之公少慕古學非三代
兩漢之書勿好也梁公常語公曰吾祖有德未盡發吾官州
郡不克施汝其能大吾門乎公愈力學

仁宗皇帝深厭吏弊思致真儒丕變治化延祐元年詔闢貢
舉網羅賢才公偕其弟祖孝俱薦於鄉公擢第一明年會試
禮部又俱中選公仍第一廷試則以國人居其首公居第二
甲第一人隱然名動京師授應奉翰林文字承事郎同知制
誥兼國史院編脩官日與會稽袁公桷東平王公士熙以文
章相淬礪三年冬擢拜監察御史時

天子臨御已久猶居東宮而羣下每因燕飲輒有奏請公上
疏曰大內正衙古帝王視朝之所今大明殿是也一陛下聖
德謙恭尚居東宮之舊願御大明正衙鎮服華夏夫陛下
承天地祖宗之重奉養當極精美調攝宜進玉食至於酒醴
固穀麥所爲然近侍進御之際可思一獻百拜之義且百官
奏事古有朝儀今承平百年文物宜備或三日二日一御朝
聽改宰相羣臣以次奏對御史執簡史官執筆搢紳佩玉儼
立左右雖有懷姦利己乞官賞者亦不敢出諸口矣初立
英廟爲皇太子公請慎選師傅朝夕輔養下至臣僕亦宜精
擇天下休戚實原乎此丞相鐵木迭兒專權擅勢大作威福
公率同列論奏其惡又摭其貪縱不法十事劾之

仁宗震怒命罷其政事將治以罪賴

太后解救得免公又言贊畫省務允宜得人而參議李羅劉吉爲丞相腹心交通賄賂左右司都事馮翌霄劉允忠依憑權勢僥倖圖進遂皆黜退又言秦州山移實惟大變非遣使祈謝振卹一方而可弭也大臣各宜辭官讓能畏懼修省史載平公石言之語世世爲監今山移之譴豈在野有當用不用之賢在官有當言不言之佞所以感召不動之物而動也於是幸臣皆家居待罪河西廉訪使杜某以赦後殺人者作赦前原之肆意廢法大都路總管范某以盜竊家貲自至兵馬司督問侵官失體並劾罷之又薦前中書平章蕭拜住左丞王毅曩在政府數與丞相抗論是非當寘機要勿令外補

朝廷緩急有所賴焉前監察御史徹里帖木兒中書參議韓若愚皆被丞相誣罔排擯早賜錄用翰林承旨劉敏中精力尙強斂身高蹈可賜半俸以厲廉隅國子司業吳澄通今博古海內名儒可進兩院以備訪問翰林修撰陳觀刑部主事史惟良其材方嚴宜居諫職公論刑獄尤本哀矜嘗請量移流罪及論禁挾弓矢曰國家不嗜殺人仁覆生齒邇年屢發德音未嘗量移流徙竊慮推恩或有未悉夫大辟死罪反被赦原而減死流徒獨不蒙澤豈法之平允哉今後果應長流請別定制否則驗情重輕度地善惡遇恩內徙幸甚又曰近制漢人百人以上執弓矢獵者處極刑百人以下流遠方徵及一兔之獲亦各有罪方今條格已有禁弓矢之科及畝

之制又復爲此錯縱而網羅之誠恐愚氓舉足蹈罪實可憐
憫蓋公建白剴切故多見於施行五年改宣政院經歷月餘
辭歸起爲社稷令被命罷襍事於泉南七年正月

仁宗竄天鐵木迭兒復居相位睚眦必報屢欲害公未得左
遷公開平縣尹開平治行都供億浩煩訟獄煩多蓋欲因事
深中傷之公退居浮光之野詠歌詩書漠然不以介意久之
丞相不得專政憂憤而死鄆忠顯王柏柱獨相旌別邪正而
陞黜之召公爲翰林待制泰定元年三月詔建儲宮尋開經
筵公拜典寶少監階奉直大夫四月

天子清暑上京以講官多老成乃命集賢侍講王公結祕書
少監虞公集及公執經從行明年拜太子左贊善尋遷翰林

直學士仍兼贊善方儲宮之建也一時賓贊之選責成輔導之意益甚重焉公述古昔調護輔翼之事上之又因成均釋奠陳太子視學之禮內廷出禮幣命公助祭三年考試大都鄉貢進士明年同知禮部貢舉取士八十五人又充廷試讀卷官是秋拜禮部尙書會祖母梁郡夫人張氏卒護喪南歸持服公事夫人克盡孝養初階官五品請於朝曰祖常幼亡母氏賴祖母鞠育有成願以封妻恩讓封祖母於是夫人封慶都縣太君著於令至是公移文曰禮有爲祖後者祖卒爲祖母齊衰三年我朝典制雖不登載然某誤擢禮官理宜從厚無何使者起復轉右贊善尋命兼經筵官又明年公始至京復入禮部階朝散大夫旋又辭歸天歷二年

文宗凡兩遣使召之方起至順初元知禮部貢舉復與士九十七人改燕王內尉又拜禮部階大中大夫公擇士務求實學空言浮詞悉棄不取中選者多知名於時參議中書省事是歲十月

文宗舉百年曠典親祀南郊公充讀祝冊官參定典儀禮成大賚四海侍祠官賜金及幣致仕官一品月給全俸二品半之三品及九品賜幣有差民年八十以上者表號高年耆德並免其家徭役公議事廟堂言簡而理明敕衛士飼駝馬者聽借民穴舍以居公曰衛士飼駝馬馬有定居今不遵舊制徒使細民橫被驚擾且祖常官列三品尙無穴舍況細民乎奏復其舊建德之民遠遊被殺莫詰誰何歲餘妻以貧改嫁

之後夫者曰知汝夫之死乎我以汝故殺之未幾事覺法司以不首坐之公曰綱常所係當以重論以責天下之爲人婦者制可其請二年拜治書侍御史遷御史進中奉大夫特賜犀帶及御書奎章閣記內宴服七襲金玉腰帶各一三年轉徽政院副使明年拜江南行臺御史中丞六月今

上皇帝卽位召公及翰林承旨許公師敬等赴上都共議新政賜公白金二百兩中統楮幣二百匹金織文織四端遷同知徽政院事是月復命儒臣進講公兼知經筵事公每進說必以

祖宗故實經史大誼切於時政者爲上陳之冀有所感悟焉是冬進拜御史中丞階資政大夫公風神秀異威嚴端重起

居皆有禮法人亦望而畏之三爲臺臣務鎮以肅或撓憲度
輒屏棄之西臺御史高坦劾同僚時禁酤酒而面有醉容公
以風憲當存禮體糾劾務有其實今以酒容罪人苛細不持
大體奏黜罷坦山東僉憲白元采按行曲阜以李經自陳不
當賂衍聖公求爲官屬及孔氏訟衍聖公不法數事以聞公
署其牘曰李經所首在赦令前宗人相訐事關名教元采聞
之亦去江西僉憲任忙古帶以貪墨敗田廬奴僕在東阿者
當沒入官公請以田廬供曲阜林廟祭享奴僕充灑埽戶從
之公喜薦拔後進及官中臺薦士尤眾故禮部尙書宋公本
初至京師人無識者公揄揚其學遂大有名嘗擬進汴處士
吳炳官風紀 上曰朕新擢炳爲藝文簿汝俟其至用之未

晚二年拜樞密副使公言軍將子弟嬌脆不勝任使當立武
學教習兵法庶不挽強蹶張徒老草野當建武舉儲材以備
非常不報公遂辭歸後拜南臺中丞階資德大夫又遷西臺
疾不赴薨年六十公娶索氏常州錄事判官某之女次怯烈
氏河南鎮守千戶和尙之女索氏封梁郡夫人婦德母儀宗
族範之子男二人武子太常太祝中書省掾奎章閣典籤兼
經筵參贊官今承務郎湖廣行中書省檢■官文子徵事郎
中祕書監著作郎孫男三人女二人俱幼公自先世皆事華
學號稱衣冠望族至公位益光顯文學政術爲時名臣尤篤
友誼昆季子孫及宗族瓜寒者悉收而教養之舉進士釋褐
上庠者凡數十人公上言本朝及諸國人旣肄國學講■孔

孟遺書當革易故俗敬事諸母以厚彝倫天下高其義公自
少至老好學彌篤雖在扈從手亦未嘗釋卷喜爲歌詩每歎
魏晉以降文氣卑弱故脩辭立言追古作者其爲訓誥富麗
典雅旣出詞林遷他官而勳閥貴冑褒贈父祖猶請公爲之
辭

文宗最喜公文嘗擬稟進上曰孰謂中原無碩儒乎文宗北
幸遠駐龍虎臺公奏事幄殿敕近侍給筆札

命公榻前賦詩卒章言兩京巡幸非以遊豫蓋爲民耳因詩
以寓諫規上覽之甚悅適太官進食乃輟尙食以賜今

上聞公痼疾特免朝會行禮命光祿日給尙醢二尊服藥療
疾近世儒臣恩遇無以踰公矣始梁公監光州有惠政公亦

愛其風土因買田築室家焉嘗贊郡守修孔子廟倡秀民興
於學接光人謙遜以和光人益敬愛公或有訟者聞公一言
卽解去不復詣府公薨光人老幼咸悲思之公有文集若干
卷奉詔修

英宗實錄譯潤皇圖大訓承華事略編集列后金鑑千秋記
略其若干卷昔者公以御史監試國子天爵偶忝科名迨遷
應奉閒以所作就正於公公曰勉之當負斯文之任於十年
後也嗚呼天爵學日荒落不克副公所教公之厚德其能忘
歟謹序次其世族官封薨葬歲月與其始終之大節合而誌
於其墓且銘之銘曰

維天生才無閒中外封殖樂育治世倏賴皇有中國萬方僉

同征伐謀猷屬諸羣雄維公之先舊興西北佐官前朝矢死
靡忒忠懿父子種德百年世載衣冠至公益宣顓頊皇猷文
華有爛邈視魏晉上本周漢帝命褒嘉中原碩儒汝執憲度
往肅姦諛正色立朝百僚震懾小臣以廉大臣以法公論刑
獄平恕不苛念彼華人日陷網羅公於人才惟祇惟慎薦揚
碩學裁抑躁進公在廊廟侃侃進言以厚倫紀以安黎元寶
帶對衣賜賚繁糶儒臣遭逢執步公武贈官賜諡爵以魏公
恤典孔昭維以勸忠瞻彼行潦朝盈夕涸江漢滔滔源遠流
濩惟馬有氏七世於茲忠懿啟之魏公大之百爾子孫思慎
其守詩書之傳允克悠久

滋溪文集卷十

碑誌四

元故少中大夫江西湖東道肅政廉訪使趙忠敏公神

道碑銘

世祖皇帝臨御中國總攬豪俊布列有位故治功興而法制
立一時賢才之盛或奮由農畝或舉於戎行或出於詩禮之
族或興於勳伐之裔若趙公者蓋其人乎公諱秉正字公亮
河北河南道提刑按察使贈太保儀同三司上柱國定國襄
穆公璿之子知太史院侍儀事贈金紫光祿大夫大司徒定
國文昭公秉溫之弟也起家武略將軍新軍上千戶官至少
中大夫江西湖東道肅政廉訪使享年六十有七以至大元

年秋七月某甲子薨於當塗寓舍二年夏五月某甲子葬於順德南和縣李馬原後三十年制贈公嘉議大夫禮部尚書上輕車都尉天水郡侯諡忠敏始刻石以文曰初

太祖皇帝兵至飛狐襄穆舉城來歸從國王木華黎戡定河朔由監中山家焉有子十一人公次居六生有異質襄穆奇之曰吾將兵不妄誅夷子孫庶有賢者中統庚申

下缺
紳先

生劉辰翁鄧光薦黎立武舍於學宮命諸生從授經訓業成者復其家士風由是浸盛移僉漢中換朝列大夫度同列不可與爲居三月遂移病去二十八年詔改提刑按察爲肅政廉訪使公僉憲河南懷孟有閒田若干頃民佃其中竊位方面者奪爲己有公復還之於民元貞初元遷山東道廉訪副

使益都宣慰使落石奏請東海之濱土皆膏腴宜爲屯田以養軍士公言田實瀉鹵不可以耕落石罔上病民言不可信朝廷爲罷宣慰使時

成宗皇帝新卽位慎選大臣尤以臺憲爲重詔拜閩省平章徹里爲南臺大夫江西行省左臣董士選爲中丞公爲治書侍御史大夫先朝舊臣威重若神以公高年獨加敬禮公爲大夫言各道廉訪司糾郡國官吏宜選御史察各道臧否而黜陟之則職業舉大夫從其言而憲紀益振江浙省臣爲姦利事覺激怒東朝廷議遣官雜治公分臺以省具得鹽司及省中大吏臧狀皆以罪黜大德五年拜江西廉訪使民間公來權曰是能縛十虎者耶貪吏望風或自引退寧州盜殺大

賈數年不獲公閱其詞以大賈嘗舍逆旅意盜爲逆旅主人
立捕至卽服明年公告老臺臣不許趣起視事又明年公復
求去官屬苦留之乃夜乘舟入匡廬山尋載其家北還至當
塗悅其土俗卜居郡城之東歲丁未江南大飢有司勸富民
出粟粟不能具民且死公謂吏曰爾以嚴刑威之粟終不可
得也當以善言諭之吏如公言果得粟以活民甚眾公少善
騎射嘗獵於野猝與虎遇眾皆辟易公引弓一發而踣從畝
柳林近侍較射爲樂公射輒中及學書筆力端勁以顏魯公
爲法公嗜讀書不尙章句獨喜古人奇節偉行雖在行陳寘
書袖閒下馬休輒誦讀軍中相謂趙生丞相渡江盡召諸將
議守襄郢統軍萬戶韓某堅請公留丞相不許宋平公出橐

中金購書萬卷輦至其家以其副分遺順德懷孟許三郡學
官北方之士賴焉公嘗言自昔中原文獻之會兵戈以來詩
書禮樂之習微矣雖公卿大家亦多雜用俗禮乃與文昭公
爲家訓以示子孫襄穆公薨親舊欲用浮屠公曰吾衣冠族
當守禮經於是衰絰喪祭一遵古制郡人化之公娶張氏再
娶劉氏子男誌先公卒儀承事郎建德路壽昌縣尹兼勸農
事儼將仕佐郎河北河南道肅政廉訪使架閣庫管勾兼照磨
侃不仕女適承直郎揚州路泰興縣尹兼勸事劉節孫男時
可時充時養時貞時會時泰時立孫女五人趙氏世家飛狐
襄穆始兆中山公母定國夫人楊氏別塋順德公疾語諸子
曰吾母愛我善事卽死葬我母旁遂從遺命始公僉憲河南

憫世俗用刑之酷乃上言曰昔唐太宗因閱銅人見人之五臟皆繫於背詔天下勿鞭背可謂仁君愛民萬世龜鑑今朝廷用刑有制而有司不詳科條輒因暴怒褫衣鞭背致人於死深負國家好生之德廟堂是其言遂著爲令銘曰
於赫

世皇立賢無方用適其宜治具畢張維人之生才有萬彙成德之士施用不器偉歟趙公悃幅無華奮其才能益大厥家飛狐被邊俗嘉騎射及家中原詩禮日化始從丞相執戈戎行南土旣平分持憲綱典刑嚴嚴風猷凜凜發摘姦貪民獲奠枕洪維

皇祖建臺之初一時老成執法不逾時方治平人皆尙行風

化肅雍州部清整公在憲府三十年餘用人之效此其權輿
維古善人爲國之紀嗟爾子孫尙續公祉

元故御史中丞曹文貞公祠堂碑銘

有序

贈體忠守憲功臣河南行省左丞魯郡曹文貞公諱伯啟既
葬礪山其令尹謀諸耆老曰公家是邑仕王朝情規重德師
表一世天下慕其風采矧吾邑人詎能忘乎眾是其言相率
爲祠於博化里奉公像而祝之遣人至維揚請曰昔者公薨
天子敕儒臣刻銘神道今祠宇旣作繫牲有石願擴公遺事
序而詩之重爲吾邑人勸是所望焉天爵弱冠獲拜公履前
公教誨甚至其敢以固陋辭國初東平嚴侯興學作士公往
游焉師事翰林承旨李公謙故其爲人廉靜溫雅筮仕礪山

文學掾歷朔州學正冀州教授訓諸生有法及見於用則以洗冤澤物爲心嘗主婺州蘭谿簿尉獲盜三十械徇諸市公曰盜無左驗其孰信乎未幾果得眞盜尉以是黜累遷常州路推官豪民黃甲持財殺人賂佃客坐之公讞得其情甲坐殺人者罪御史潘昂霄憲副正俟交薦其賢擢拜西臺御史關輔自許文正公倡鳴道學以附多士公請於朝建祠以表其功築室以訓來學涇陽民誣其尹不法公核其實抵民以罪蜀僉憲以苛刻聞公列其狀去之善善惡惡克協於理延祐元年由中臺都事除刑部侍郎時相擅政威燄赫然一日盛怒召公等至曰西僧訟某之罪何爲久弗治也眾莫敢對公徐進曰某罪犯在赦前故弗敢治相益怒左丞起進曰曹

侍郎素稱廉直某罪誠如所言相怒稍解宛平尹盜官帑事
覺宰臣欲誅其守者公曰守者罪不至死杖而遣之或謂公
屢忤宰執盍稱疾避之公曰禍福命也第謹吾職而已久之
出爲真定路總管治尙寬簡民便安之遷司農丞拜南行臺
治書轉福建廉使未行改左司郎中至治元年遷遼東廉使
京師西山敕大建佛廬御史言歲飢民貧請緩其役近侍有
恚臺諫者激怒主上而御史以讒死公抗章言臺臣某叨
塵清要拱默苟容使昭代有殺諫臣之名宜示顯責用懲具
臣時避其言召爲集賢侍講學士拜侍御史奉詔刪訂條格
公曰刑貴適中今民犯罪旣黜而杖復加流竄是一人身備
五刑故生還者百無一二殊乖列聖子育元元之盛德法

當改易丞相是其說會公除浙西廉使不果泰定初元公引
年北歸優游鄉社殤人樂公之德表所居爲曹公里

文皇卽祚以廉使重任詔徵耆舊爲之公落致仕使淮東時
方旱歉飭有司發粟振窮乏及聞中丞之命則曰吾年且八
十尙忘知止之戒乎公平生以人才爲任在中臺時薦名士
若干人爲侍讀考試國子拔呂思誠姚紱寘前列及監浙省
憲賁選士尤精雲南僉憲范震言宰臣罔上欺下不報范飲
恨死公具其事書於太史眞州守呂世英以剛直獲罪公白
其枉進擢風紀公性莊肅奉身清約雖爲貴官飲食服用不
異於儒素公退讀書不倦教子孫嚴而有禮諸子晉寧縣尹
震亨臨江儒學教授賁亨福建鹽司經歷泰亨江南行臺御

史復亨陝西行臺掾履亨佩服公訓皆克有聞公嘗歎曰比見官治民俗歲殊日異習熟見聞以爲當然非上之人作新丕變未易復舊貫也嗚呼昔我

世祖皇帝既定海宇建官立制任賢使能以興治功至於本乎詩書之訓發爲仁義之言深謀遠圖贊襄國論以成天下之務者唯一二儒臣是所賴焉公蓋及事至元故老學有本原其處心平易而不計其爲政安靜而不擾用能敷歷中外五十餘年海內推爲鉅人長者今已矣典型風裁豈一鄉一邑所當法哉銘曰

錫山之墟河流訇磕昔產豪雄奮烈忼慨温温魯公獨稱鉅儒長裾玉佩步武其餘天啟治平羣賢林立如彼威鳳有道

斯集入贊國論出總憲綱譏排姦倖扶植善良心焉和平行
焉忠厚興治善俗允屬耆舊君子豈弟天厚其門有祿有年
蕃蕃子孫維古先哲道德可仰里社尸之來格來享咨爾礪
人匪公曷師祠以報德徵此銘詩

故集賢大學士光祿大夫李文簡公神道碑

仁宗皇帝臨御之初方內晏寧乃興文治一時賢能材藝之
士悉置左右皇慶元年秋八月某甲子特命中大夫常州路
總管李公爲吏部尙書卽日遣使召之蓋 上在潛邸已聞
公名旣至禮遇隆重字而不名明年公請致仕 上不允尋
又以爲言

上曰仲賓舊人宣力有年不可令去禁近超拜集賢大學士

榮祿大夫當是時朝之宿學碩儒名能文辭翰墨者若洛水
劉公賡吳興趙公孟頫保定郭公貫清河元公明善皆被眷
顧士林欣慕以爲榮公居其閒年德俱尊國有大政則偕諸
老臣議之衣冠整肅言論從容廷臣莫不起敬世戚大家欲
銘勳伐德業者必屬公等論撰書篆子孫始以爲孝公翰墨
餘暇善圖古竹木石庶幾王維文同之高致而達官顯人爭
欲得之求者日踵門公弗厭也久之公以疾辭 上不得已
許之進官光祿大夫敕賜幣帛酒饌俾使者護送南歸又擢
其子士行知泗州使侍養焉嗚呼

仁宗所以優禮耆艾崇尚藝文於此蓋可觀矣公享年七十
有六以延祐七年十月二十四日卒於維揚葬江都縣某鄉

某原後二十二年其孫希閔請於朝始贈公翰林學士承旨
柱國追封薊國公諡文簡公諱衍字仲賓也世爲燕人考府
君以儒名兼通天文律歷之學

世祖皇帝聞其名召而問之以非官守不敢言公少警敏有
俊才

世祖新作都城崇奉宗廟公起家將仕佐郎太常太祝兼奉
禮郎尋又命兼檢討久之遷承務郎淮東道宣慰使司都事
至元十九年宣慰司罷轉江浙行省左右司員外郎二十四
年改江淮行省員外郎朝廷遣官稽核郡縣錢糧公分江浙
省人不以爲苛成均旣立詔徵江淮學廩之餘以給師生公
又承命往士不以爲擾二十八年遷承直郎都功德使司經

歷三十一年

世祖賓天

成宗繼序詔罷征安南兵釋其陪臣陶子奇等擢拜公朝請大夫禮部侍郎往諭其國賜金虎符佩之以兵部郎中蕭秦登爲之副別賜衣物鞍勒有差時交廣新劄於兵人憚其行公無難色命有司置騎傳萬夫長部兵從行安南聞有詔使且疑且懼公至宣

聖天子休兵息民一視同仁之德意國王及其臣民拜伏以聽感戴歡呼大喜過望歸所盜邊地二百里遣其臣奉表謝罪遺公等橐中裝甚厚皆辭不受益之再三終讓卻之愈大感服元貞改元九月公偕使者入覲錫賚蕃渥明年公請補

外除同知嘉興路總管府事再遷婺州佐兩郡凡十年天下
無事年穀豐穰法制寬簡士大夫亦多樂外官公操韻高潔
又喜吳越風土所在興學訓士暇則自放山水閒蓋隱然承
平官府之舊民亦悅其安靜之化焉公有吏能嘗奉詔錄囚
江南或疑不能決者公得其請多所平反常州學田萬畝曾
冒種三之一公言行省復歸諸士在郡歲餘被召公既貴郵
典上及三世曾祖大臨贈翰林侍講學士中奉大夫護軍范
陽郡公諡恭懿祖襄贈資善大夫大司農卿上護軍范陽郡
公諡忠惠考居實贈榮祿大夫大司徒柱國薊國公諡文康
曾祖妣馬氏祖妣陳氏俱追封范陽郡夫人妣苗氏繼妣張
氏俱追封薊國夫人公元配曾氏追封薊國夫人繼王氏封

勳國夫人子男士行世其學終奉訓大夫知黃巖州兼勸農
事士昌江東憲史女士貴適奉議大夫惠州路總管府判官
張汝霖士柔適王昇士能在室孫男希閔温州永嘉尉餘二
人幼公性和厚人不見其喜愠家居不治生業子孫皆以清
慎聞初表所居曰息齋晚號醉車先生作傳以自適天爵使
憲淮東希閔請銘公墓昔公官集賢時天爵補國子員獲瞻
拜公追思先朝故老漸以漸盡然則紀述先進言行非後生
責乎銘曰

於皇 仁宗方內晏寧崇儒稽古詠歌治平一時臣工來際
昌運翰墨藝文咸啟其蘊雍容李公帝命褒嘉峻陟崇班歷
游清華公方少時恭侍太室典禮憲章討論遺逸出佐省幕

婉畫是咨

帝念南郊久罷吾師咨汝臣衍往宣子澤公偕陪臣來貢玉帛歷官列郡敷惠在民召侍左右允維舊臣帝眷方隆公遽告老白髮蒼顏天錫壽考爰卜新兆其下邗溝矢銘貞石尙永公休

故河東山西道肅政廉訪使贈禮部尙書王正肅侯墓誌銘

朝列大夫河東山西道肅政廉訪使贈嘉議大夫禮部尙書上輕車都尉追封太原郡侯諡正肅王公諱仁字仲安由祖以上世家雲中譜亡逸其諱考諱世明國初從兵破汴俘匠千人詔佩金符領其眾久之擢知中山府事因留家焉公幼

襲父官已而讓其弟刮磨豪習從師問學卓然以古人自期由是名聞燕趙閒至元十二年王師渡江下江陵詔平章廉文正公鎮撫其地承制除三品以下官廉公求名士與偕公在選中至則授歸州安撫副使因其土俗治以簡靜民便安之無何嶮峒諸蠻來歸公與有力明年宋亡又明年江南諸道置提刑按察司公以才擢僉江東按察司事是時海宇治平方臻朝廷屢下詔書訓農興學修利除弊中外材能之臣亦皆凜凜思樹聲名以需進用而憲司尤極一時之選公於其時歷僉淮西山東燕南按察使事所至郡縣獎善罰惡勇於有爲故君子聞之爲之興起貪邪之人或自引去雖劾其罪亦言無所冤饒之監郡烏倫赤貪汚病民順德監郡朵羅

帶盜用官帑公發其事皆伏辜故相順德忠獻王由大宗正
拜湖廣行省平章道出眞定謂公曰居官難居憲司又難治
罪奪職而人弗怨此其尤難也使官風紀者皆然而人寧有
負冤者歟會改提刑按察司爲肅政廉訪公移僉山北廉訪
司事遷陝西副使改河南副使皆移病不赴大德九年徵拜
治書侍御史議者以京官任劇宜增秩以優其祿公曰御史
之職在進賢退不肖悅眾要譽非所當爲也或請檢江淮閑
田募民佃作歲益得租若干萬石公言自宋金亡治平日久
編戶益滋閑田無有也議遂寢無幾以疾辭歸旋有河東之
命復辭以疾公爲人孝友廉退少夷厥父勺水不飲者三日
旣葬居倚廬示嘗輒至私室又官淮西妣夫人卒願終喪制

有司以法不許公曰親喪三年隆古之制尙忍以例言耶遂
棄官去初在歸州官屬餽遺一無所受從者私受富人金百
兩公弗知也是夕夢若神人來語其事覺而詰之卽命以金
還其主官屬異之多以廉自飭歸老於家築室唐水之側日
讀伊洛諸書怡然若有得焉有詩五卷藏於家以至大四年
八月某日卒享年七十有一某年某月某日葬安喜縣九真
鄉之原公娶史氏早卒再娶其姊俱追封太原郡夫人子男
曰簡疾不仕曰靜承直郎侍儀通事舍人銘曰

允矣王公秉德惟恭介介其守不逾初終公在至元繡衣持
憲鋤姦擢良列城用勸靡移於怨勿牽於恩克協於中休有
令聞晚起於家治書烏府諤諤昌言以規以補相彼唐水薄

言屏居進退雍容風節偉如九真之原公墓有歸載德銘詩
爰詔無已

元故少中大夫江北淮東道提刑按察使董公神道碑

銘

董氏之族居真定橐城者爲最盛公其一也公諱源字巨源
四世祖提金洺州防禦使曾祖公毅祖簡再世勿顯父思誠
舉進士知名妣許氏公生七年從親避地居河南之永寧讀
其父書稍長而有俊才又多謀略金將亡父母俱卒橐殯永
寧之野未幾兵興公被俘一大帥帳下同俘者多被殺公以
儒生得存帥命教其子弟有閒徑歸永寧訪其親遺骸兵荒
之餘暴骨如莽公齧指漚血方求得之負而北還崎嶇艱危

始達鄉里既葬依宗人棗城令文炳以居復師事翰林王公若虛王公在金時擅重名至是及門者眾獨推公爲第一遂挾其能游諸公間名聲藉甚一時碩儒若王公磐李公治姚公樞李公槃張公肅高公鳴蓋其交友中書楊公太保劉公丞相史公尤奇其材共以國士許之國家初興方事戎旅楊公以征南行省史公以行軍萬戶俱治兵於外先後以幕府辟公公辭不應或問其故勿答也及

世祖御極更新庶政四方豪傑悉起而爲之用於是史公承詔宣撫河南復薦公爲經歷官乃慨然就職曰時可以行吾學矣征誅治化多資於公

上聞其名召與語奇之留置左右中統三年春山東守將李

壇陰結宋人據濟南叛史公已居相位分省兵將往征之以
公爲左司郎中是時朝廷肇進官儀每除拜猶令翰林行制
以訓敕之告公之詞曰董某秉心端慤處事詳明草軍前之
檄孰比陳琳談當世之事共推王猛宜頒顯幄以佐行臺尙
盡乃心克成厥績公請周城樹柵遏其侵軼使賊無外援城
中食盡則自降矣已而果然壇旣伏誅改行省爲濟南濱棣
益都等路宣慰司復以公爲參議諸侯王唐古帥蒙古軍士
萬人鎮益都王以齊人向從賊亂欲縱兵誅夷公曰亂者壇
耳民實何罪壇旣授首餘皆王民今欲兵之是激其爲亂也
因極陳古昔殲厥渠魁協從罔治之訓以諷王王是其言齊
人賴以全活者無慮萬數至元四年遷轉法行調西京路判

宣六年秋上念國囚在獄者或多冤濫詔中書選官決之
公偕斷事官鉞木爾分行西夏中興諸路周歷沙漠蓋萬餘
里所決遣者悉稱平允九年遷奉訓大夫知林州州無屬縣
尙親治民公嚴法以馭吏布惠以養民民悅其政如父母焉
賜廷滋以爲材遂擢朝列大夫山北遼東道提刑按察副使
改行郡縣風采聳然監察御史表其廉能十六年超拜少中
大夫江北淮東道提刑按察使公以老疾辭上曰江淮新附
之邦民尙未洽吾元聲教非得老成舊臣孰能撫綏而鎮安
之朕固知卿高年其乘輶傳以往公整齊其大體闡略其細
改一以敦俗興化惠安元元爲務歲餘江淮之民樂其清簡
之治爲吏者恥其貪污之行皆仰公若神明焉公語同列曰

大夫七十而致仕禮也吾敢久貪榮寵弗知止乎卽移病謝歸葺第眞定闔門謝賓客娛意圖史以終其天年嘗作家訓以教子孫導江張氏覽而善之曰非止家訓要以警世可也子孫服公之訓皆以學行聞於時享年八十有七以至元三十一年十一月二十一日卒是歲十二月十五日合夫人尙氏之喪葬橐城縣安仁鄉南董村先塋董氏葬是二百餘年矣子男二人曰儀終行省郎中曰居中終靈壽縣尹二女長適郭秉德次適栢縣尹張行中孫男三人堅均基曾孫男三人興宗起宗承宗公旣葬之三十有九年當至順壬申基撰公行事徵銘神道之碑基之言曰昔者先公被遇

世祖列官三品德業著聞基也幼孤而弗克知幸其一二可

考知者誠懼歲久又泯泯也然而古之君子其言行豈能盡傳於世惟其大節不誣則固史氏所宜書也夫銘誌之作義近於史蓋銘其所可知則其未盡知者可推而知矣天爵受其言退而述之以銘銘曰

於赫

世皇百治具張小大有位無材不良偉歟董公才請多譽相時而興雍容中度疇須奇畫我其資之疇須善政我其施之帝瞻南邦未治聲教尙資老成克撫無撓自昔有國黃髮是詢有典有則永綏兆民曾無百年故老漸盡公有慈孫嗣守遺訓考公大節廩廩不誣爰徵銘詩式表幽墟

祕書少監王公墓誌銘

中統建元之明年

世祖起中山王公爲贊善大夫輔

皇太子親授之書是爲

裕王其書冊之端有親書廟諱厥後書歸王氏延祐三年

仁宗御光天殿贊善之子祕書少監賓執其書以獻上穆然

曰是皇祖所讀之書歟朕何敢不敬有詔褒寵王氏曾祖順

贈中奉大夫太常少卿中山郡公諡安定祖良贈昭文館大

學士資善大夫中山郡公諡端愨父嘉議大夫太史令恂贈

推誠守正功臣光祿大夫司徒上柱國定國公諡文肅曾祖

妣趙氏祖妣劉氏俱追封中山郡夫人妣張氏追封定國夫

人繼妣氏封定國夫人又命中書遷賓官未及命而賓卒延

祐七年夏六月某日也當是時天子方鄉文學寶重以是起
之贈典髫久已祖宗蒙是休澤可謂忠於上而孝於親者矣
公字子立賓其諱也贊善之幼子性資開敏初從祭酒許文
正公游小學四書悉能通其大旨贊善兼以星官歷法妙一
世既爲太史改正歷日公亦傳其學贊善薨選爲太史院保
章副累遷至少監焉公少長富貴未嘗有富貴氣容儀雅潔
若寒士然居京師未嘗謁貴人門嘗語其子弟曰吾名臣後
也當慎守先業豈可妄與新進小生交游哉至大中尙書因
省某挾異書遂起羅織之獄公視家所藏凡涉天文陰陽家
者悉焚之謹厚類此娶郭氏太史院使守敬之孫都水少監
某之女二子楨主滄州清池簿桂補太史星歷生公享年五

十有二權殯都城東南十里楨將以至治三年六月某日葬
公安喜縣北扈原銘曰

於皇仁宗文治太平一時才藝咸立禁庭矧茲遺經裕皇宸
翰藏之臣家榮光有爛恭進丹陛允也其時斯文日興亦公
啟之愍冊穉章褒及祖考將進大官胡命不偶北戶之原土
厚泉深銘昭厥美以視來今